

SARA CITTA

Om Swastiastu, Om Awignamastu Namu Sidham

Mungguwing desane puniki wantah pawakan pasayuban krama desane rawuhing kulawarga pawongania.

Manut dresta desane kemanggehang Bhuwana Agung, pawongania soang-soang punika Bhuwana Alit. Adung patemon kang Bhuwana ruwa kawentenan kahuripan sakala-niskala larapan Santa Jagathita sinanggeh murdaning prayojana pangriptaning awig-awig.

Sotaning Bhuana Agung, Desane wantah pawakan "Bhuana Maurip" jangkep saha Tri-Hita-Karana, lwire:

Ha. Parhyangan : Sahanan Kahyangan panyiwian Desa, genah ngarcana Hyang, maka Jiwatman Desane.

Na. Palemahan : Tanah kakuwub saha dagingnya, sinanggeh Angga sarira tawulan desane.

Na. Pawongan : Warga desane sami, pawakan Tri-Kaya, awanan desane sidha molih maprawerti.

Putusan paruman Desa Adat Padang Luwih gumawe awig-awig puniki, maka sepat siku-siku pamatut wastu kasidan prayojana mami kabeh prasama angidep muah amagehaken sakadi linging awig-awig puniki.

**BANTANG AWIG-AWIG
DESA ADAT PADANG LUWIH**

SARA CITTA	i
BANTANG AWIG-AWIG DESA ADAT PADANG LUWIH	ii
SARGAH PERTAMA ARAN LAN WAWIDANGAN DSA	1
SARGAH KALIH PAMIKUKUH LAN PATITIS	2
SARGAH TIGA SUKERTA TATA PAKRAMAN	3
Palet 1 Indik Krama	3
Palet 2 Indik Prajuru	13
Palet 3 Indik Paruman	18
Palet 4 Indik Kulkul	20
Palet 5 Indik Druwen Desa	22
Palet 6 Penyanggra Banjar	26
SARGAH PAT SUKERTA TATA AGAMA	28
Palet 1 Indik Dewa Yadnya	28
Palet 2 Indik Rsi Yadnya	36
Palet 3 Indik Pitra Yadnya	38
Palet 4 Indik Manusa Yadnya	45
Palet 5 Indik Bhuta Yadnya	46
SARGAH LIMASUKERTA TATA PAWONGAN	50
Palet 1 Indik Pawiwahan	50
Palet 2 Indik Nyapian	57

Palet 3 Indik Sentana	61
Palet 4 Indik Warisan	64
SARGAH NEM SUKERTA TATA PALEMAHAN	68
Palet 1 Karang Tegal lan Carik	68
Palet 2 Pepayonan	70
Palet 3 Wawangunan	71
Palet 4 Wawalungan	72
Palet 5 Bhaya	73
SARGAH PITU WICARA LAN PAMIDANDA	75
Palet 1 Indik Wicara	75
Palet 2 Indik Pamidanda	77
SARGAH KUTUS NGUWAH-NGUWUHIN AWIG-AWIG	79
SARGAH SIYA PAMUPUT	80
LEPIHAN (PAKELING) :	
1. Bebanten Rikala Nunas Tirta ring Kahyangan Tiga (Penebas Tirta lan Bebanten Upakara Ngaben Ngidih Olas wiadin Mapendem.	
2. Daftar Nama-nama Pura ring Wawidangan Desa Adat Padang Luwih.	

SARGAH PERTAMA
ARAN LAN WAWIDANGAN DESA

Pawos 1

- (1) Desa Adat puniki mawasta Desa Adat Padang Luwih;
- (2) Jebar kakuwub wawidangania mawates nyatur, inggih punika:
 - Ha. Sisi Lor : Desa Adat Abianbase lan Desa Adat Kuwanji Sempidi;
 - Na. Sisi Wetan : Desa Adat Kuwanji Sempidi lan Desa Adat Padangsambian lan Desa Adat Kerobokan;
 - Ca. Sisi Kidul : Desa Adat Kerobokan;
 - Ra. Sisi Kulon : Desa Adat Padonan lan Desa Adat Dalung;
- (3) Wates wawidangan desa punika kajangkepan antuk “Peta Desa Adat Padang Luwih” sakadi mungguh ring lempihan awig-awig puniki;
- (4) Wawidangan Desa Adat Padang Luwih, kasanggra antuk 6 Banjar Adat/Suka Duka luwire:
 - Ha. Banjar Adat Kuwanji;
 - Na. Banjar Adat Gaji;
 - Ca. Banjar Adat Jeroan;
 - Ra. Banjar Adat Pendem;
 - Ka. Banjar Adat Celuk;
 - Da. Banjar Adat Tegaljaya;

SARGAH KALIH

PAMIKUKUH LAN PATITIS

Pawos : 2

Desa Adat Padang Luwih puniki ngamanggehang pamikukuh:

- HA. Pancasila;
- NA. Undang Undang Dasar 1945;
- Ca. Tri Hita Karana manut sada cara Agama Hindu;
- Ra. Hak Asasi Manusia;
- Ka. Uger-uger saking Guru Wisesa, indik Desa Adat;

Pawos : 3

Luwir patitis Desa Adat Padang Luwih:

- Ha. Mikukuhin miwah ngerajegang Agama Hindu;
- Na. Nginggilang tata prawertine magama Hindu;
- Ca. Ngarajegang kasukertan desa saha pawongania sakala lan niskala;
- Ra. Ngarajegang kasukertan druwen Desa Adat Padang Luwih;

SARGAH TIGA

SUKERTA TATA PAKRAMAN

Palet: 1

Indik Krama

Pawos : 4

- (1) Sane kabawos warga Desa Adat Padang Luwih inggih punika: sahananing jadma sane magama Hindu jumenek ring Wawidangan Desa Adat Padang Luwih;
- (2) Sane kabawos Krama Desa Adat Padang Luwih inggih punika: Kulawarga sane magama Hindu, sampun marabian lan tedun mabanjar adat, mipil miwah nyungkemin Kahyangan Tiga tur jumenek ring Desa Adat Padang Luwih;
- (3) Sajaba punika sinanggeh tamiu. Tamiu punika manut linggih nyane kabinayang dados kalih: sane magama Hindu lan siosan ring sane magama Hindu;

Ha. Tamiu sane magama Hindu inggih punika:

- 1) Krama saking dura Desa Adat Padang Luwih, magama Hindu, arep mawirasa, sareng nyungkemin Kahyangan Tiga, lan nginutin sakadi desa, sakewenten nenten mipil;
- 2) Krama tamiu sekadi punika yan jumenek sasihan, patut sajeroning awuku masadok ring Kelian Dinas utawi Kelian Adat, antuk ilikita pastika;

- Na. Tiosan ring krama inucap, ring desa adat taler wenten kabawos tamiu, inggih punika kulawarga sane nenten magama Hindu, wantah sareng nyungkemin ring pawongan lan palemahan Desa Adat Padang Luwih;
- Ca. Sang pecak keni ayah suka duka adat nanging sampun wusan makrama wiadin mawarga desa;

Pawos : 5

Krama Desa Adat Padang Luwih wenten limang soroh luire:

- (1) Krama Wed (wedan) inggih punika krama sane sampun jumenek tur madesa adat wit saking kaluhurania;
- (2) Krama Ngarep inggih punika krama utawi kulawarga sane malarapan wed utawi pangrawuh saking dura desa, sane sampun mawiwaha tur sampun katedunang makrama banjar adat, kasaksiang antuk prajuru banjar;
- (3) Krama Ngarep Desa Adat Padang Luwih: sane jumenek, ring dura desa, doh saking Desa Adat Padang Luwih kalugra numbas ayah-ayahan desa/banjar;
- (4) Krama daha teruna: krama sane mayusa 15 – 30 warsa tur durung merabian;
- (5) Krama Balu: krama sane nyapihan utawi sane ketinggalin sangkaning sane istri utawi sane lanang padem. Krama Balu puniki kepah dados papat soroh, inggih punika:

- Ha. Balu makrambian, inggih punika balu sane sampun mapianak, macucu, makumpi tur kari dados tategenannya;
- Na. Balu ngempu, inggih punika krama balu sane madruwe pianak kari alit;
- Ca. Balu ngatung, inggih punika krama balu sane nenten madruwe putra utawi sameton, nangin maduwe pusaka (warisan);
- Ra. Balu nglisting, inggih punika krama balu sane nenten maduwe sentana, arta warisan lan sameton;

Pawos : 6

- (1) Tata caraning ngeranjing dados krama banjar adat utawi dados krama desa adat, makadi ring sor :
 - Ha. Mawiwit jumenek tur dados krama adat ring Desa Adat Padang Luwih saking kaluhurannya;
 - Na. Mawiwit jumenek mapaumahan utawi ngarereh pangupa jiwa risajeroning palemahan Desa Adat Padang Luwih;
 - Ca. Malarapan antuk pawiwahan pratisentana manut tata cara agama Hindu;
 - Ra. Sang saking siosan desa, keni pacingkrem manut pararem;
 - Ka. Sang saking sewosan desa makta ilikita jangkep saking desa wed;

- (2) ? Warga utawi kulawarga jumenek ring desa adat, patut sajeroning awuku masadok ring klihan Dinas utawi Kelian Adat antuk ilikita pastika;
- (3) Krama desa mangda mabanjar ring asiki banjar adat ring desa Adat Padang Luwih, tedun makrama banjar malarapan antuk atur supeksa ring prajuru banjar tur ngaturang pejati ring Palinggih Sedahan Banjar;
Krama Tamya. ?
- (4) Tata caraning dados tamiu;
- Ha. Patut masadok ring klihan dinas utawi kelian banjar adat;
- Na. Naur prabea manut pararem;

Pawos: 7

Panumaya tedun makrama desa:

- (1) Malarapan antuk pawiwahan risampune katedunang makrama banjar adat (masengker 2 (kalih) sasih ngawit saking rahina pawiwahannya);
- (2) Malarapan antuk ngarereh karya utawi pangupa jiwa utawi patilar rahayu warga desa siosan saha jumenek, risampun katedunang makrama banjar, patut atur supeksa ring Prajuru desa malarapan antuk pajati katur ring Kahyangan Tiga lan satinut ring daging awig-awig Desa Adat Padang Luwih;

Pawos : 8

Tategenan krama Desa Adat Padang Luwih;

- (1) Krama ngarep, krama balu makrambian lanang istri keni ayah ngarep lan papeson sawungkul;
- (2) Krama ngarep sane ngrereh pangupa jiwa ring desa siosan keni utawitan keni ayah nanging papeson lan punia manut pararem utawi dudonan;
- (3) Krama krama dandanan waris tur maduwe daa teruna keni ayah roban lan sampun mayusa sekirang ipun 17 warsa;
- (4) Krama balu ngempu, krama daha teruna: keni ayah lanang/wadon lan papeson pah ro jangkep;
- (5) Krama balu nglisting: tan keni ayah lan papeson;

Pawos : 9

Swadharma krama desa sakadi ring sor:

- (1) Patut satinut ring sedaging awig-awig miwah pararem desa;
- (2) Satinut ring tatiwak Desa Adat nganinin indik ngupadi kasukertan desa adat sakala lan niskala;
- (3) Tan kengin nungkasin kerti yasan Desa Adat;
- (4) Patut masadok ring klihan Banjar ritatkala narima tamiu lintangan ring 24 jam;
- (5) Ngaturang punia lan ayah ring parhyangan manut kabuatan;

(6) Krama desa ngarep Desa Adat Padang Luwih sane ngarereh pangupa jiwa tur magenah ring ^{desa} desa kasulurang :

Ha. Keni ayah/tan kenih ayah manut dudonan banjar/desa;

Na. Keni punia manut pararem desa;

(7) Krama balu kenih ayah lan papeson sakadi:

Ha. Balu makrambian kenih ayah lan papeson sakadi ring sor:

- 1) Balu makrambian lanang-lanang kenih ayah lanang lan papeson separo jangkep;
- 2) Balu makrambian wadon-wadon kenih ayah wadon lan papeson separo jangkep;
- 3) Balu makrambian lanang wadon kenih ayah ngarep lan papeson sawungkul;

Na. Balu ngempu kenih ayah lan papeson sakadi ring sor:

- 1) Balu ngempu lanang miwah putrane sampun menek teruna kenih ayah lanang lan papeson separo jangkep;
- 2) Balu ngempu wadon miwah putrane sampun menek daa, kenih ayah wadon lan papeson separo jangkep;
- 3) Balu ngempu lanang utawi wadon, sane putrane sampun menek teruna daa, kenih ayah ngarep saha papeson sawungkul;

- 4) Balu ngempu lanang utawi wadon, sane putrane durung menek teruna utawi daa, keni ayah balu lalang/wadon saha papeson separo jangkep;
- Ca. Balu ngatung tan keni ayah nanging keni papeson separo jangkep;
- Ra. Balu nglisting tan keni ayah lan papeson (tan keni punapa-punapi). Prade wenten krama balu nglisting sane lampus mangda kasanggra sakadi sane munggah ring pawos 37 ayat 2, ha;
- (8) Krama nyapihan lan krama daha-teruna keni ayah lan papeson manut dudonan sakadi krama balu ring ajeng;

Pawos : 10 *liat pawos 9.*

- (1) Swardarmaning krama desa sewosan ring ayah-ayahan lan papeson luwire:
- Ha. Tinut saturut ring sadaging awig-awig, miwah pararem-pararem desa;
- Na. Tan maren ngutsahayang mangda desane prasida nyujur manut patitis sakadi sane munggah ring ajeng;
- Ca. Sayaga sareng natakin panes-tis kertiyasan/pasuka-dukan Desa Adat;
- Ra. Keni paturunan, peson-peson lan ayah-ayahan manut pararem;

- (2) Swardamaning krama banjar kengin ngardi parareman banjar, sane tan piwal ring sadaging awig-awig lan pararem desa adat padang luwih;
- (3) Swadarmaning tamiu: *depenyada*.
- Ha. Tinut ring tatiwak desane ngupadi kesukertan desa sakalaniskala;
- Na. Tan kengin tungkas ring sepemargin pasukertan desane;
- Ca. Patut masadok ring Klian Dinas utawi Klian Banjar Adat;
- Ra. Keni punia manut pararem;

Pawos : 11

Kapatutan krama lan tamiu sakadi ring sor:

- (1) Kapatutan krama adat sakadi ring sor:
- Ha. Polih pasayuban saking desa adat;
- Na. Polih kasukertan miwah kasucian dewek, parhyangan miwah karang nyane;
- Ca. Polih kasukertan padruwean nyane soang-soang;
- Ra. Nyarengin paruman desa/banjar saha wenang mastikayang pamutus lan mapasuara;
- Ka. Polih pamutus saking prajuru ritatkala wenten wicara;
- Da. Ngamedalan usul ritatkala wenten paruman ring desa sane mabuat;

- Ta. Maduwe hak mamilih wiadin kapilih dados pamucuk lan prajuru (manut dudonan);
- Sa. Polih laluputan manut pararem;
- (2) Keputusan krama tamiu makadi ring sor:
- Ha. Patut madana punia ring desa/banjar manut pararem;
- Na. Patut polih pasayuban marupa pitulung rikanjekan katiben panca bhaya;
- Ca. Polih pamutus saking prajuru ritat kala wenten wicara;
- (3) Krama desa lan tamiu tan kadadosang, makta, nganggen sarana sane tan manut ring uger-uger guru Wisesa. Sane piwal patut keni pamidanda manut daging pararem;
- (4) Sinalih tunggil kraima desa lan tamiu tan kadadosang ngajak wong wadon tuna susila ngranjing miwah ngarerep ring wawidangan desa adat, sapisira ugi sane piwal patut keni pamidanda manut pararem;
- (5) Keputusan tamiu makadi ring sor:
- Ha. Patut madana punia ring desa/banjar adat manut pararem.
- Na. Patut polih pasayuban marupa pitulung rikanjekan katiben panca bhaya;
- Ca. Polih pamutus saking prajuru ritatkala wenten wicara;
- (6) Krama Desa Adat kadadosang :
- Ha. Mapuangkid utawi tan tedun lwire:
- 1) Ritatkala mayajnya;

2) Maluasan utawi ngaluang;

3) Matepetin selami asasih;

4) Sungkan selami sungkan sane katetes antuk prajuru;

Na. Nyada mapiteges wusan ngayah utawi ngamademang ayah risampun mayusa 65 warsa utawi sampun wenten sane nyuksukin miwah sangkaning sakit sane kasulurang manut pararem;

Pawos : 12.

Wusan dados krama desa/banjar sakadi ring sor:

(1) Sangkaning :

Ha. Seda;

Na. Pinunas ngaraga, sangkaning magingsir genah saking wawidangan Desa Adat Padang Luwih, kaduluran antuk nunas panugrahan, pailikitan prajuru;

Ca. Kanorayang, malantaran piwal ring daging awig-awig/ pararem desa /tan satinut ring pituduh prajuru;

(2) Sang wusan makrama desa taler wusan makrama banjar mangdane tan empak-ngelanting;

(3) Tan polih pah-pahan druwen desa/banjar, tur tan polih pasayuban sajeroning ala-ayu;

(4) Sang wusan makrama desa sangkaning rahayu, polih ilikita bukti patilar saking prajuru, yan sangkaning tan rahayu, tan polih ilikita;

- (5) Sang kanorayang, dados malih tedun makrama desa/banjar, manut daging pararem;

Palet : 2.

Indik Prajuru.

Pawos : 13

Prajuru desa Adat Padang Luwih dudonan nyane sakadi ring sor:

- (1) Pamucuk desa: Inggih punika satunggil prajuru ring desa sane Pinih muncuk linggihnya;

- (2) Pamucuk Desa dudonan nyane makadi ring sor :

Ha. Panua Pamucuk Desa makadi Kelian Desa Adat Padang Luwih ;

Na. Pangliman-pangliman pamucuk desa makadi wakil pamucuk;

Ca. Panyarikan-penyarikan pamucuk desa makadi juru surat;

Ra. Panyanggra Pemucuk Desa makadi pasayahan;

Ka. Panyade Pamucuk Desa makadi seksi-seksi.;

- (3) Prajuru Desa inggih punika :

Ha. Kelian Desa Adat .;

Na. Pangliman utawi wakil; *peteguh*

- Ca. Panyarikan utawi sekretaris;
 - Ra. Sedahan Desa Adat utawi Petengen;
 - Ka. Panyanggra Prajuru Desa Adat (Pembantu);
 - Da. Panyade Prajuru Desa Adat (Seksi-seksi);
- (4) Mungging sane dados pamucuk desa inggih punika:
- Ha. Utusan-utusan saking soang-soang banjar sakirang-kirang ipun kalih diri manut dudonan;
 - Na. Taler dados krama desa sane siosan ring aksara ha, na, sane kamanggehang pamucuk ring desa;
- (5) Sane dados Panua Pamucuk desa inggih punika Kelian Desa Adat;
- (6) Prajuru desa inggih punika satunggiling prajuru ring desa sane ngalaksanayang sakaluwiring rencana pewangunan desa, pararem lan dresta sane sampun lumrah mamargi ring Desa Adat Padang Luwih;
- (7) Prajuru desa kamanggalaning antuk Kelian Desa Adat;
- (8) Sane wenang nyusun prajuru desa inggih punika pamucuk desa. Ritatkala pamucuk desa nyusun prajuru desa, kengin ngambil saking:
- Ha. Utusan-utusan saking soang-soang banjar sakirang – kirang ipun ipun kalih diri ;
 - Na. Krama siosan sane tan dados utusan banjar nanging kasudi olih pamucuk desa ;

- Ca. Klihan suka duka banjar sawewidangan Desa Adat Padang Luwih;
- (9) Sasampune Prajuru Desa kapilih lan sah mangda kasobyahan ring krama desane;
- (10) Uger-uger dados prajuru ring desa:
- Ha. Krama banjar utawi krama desa;
- Na. Tan cedangga;
- Ca. Uning ring panglogika;
- (11) Prajuru ring desa kaanghang suwenipun 3 warsa, tur dados kapilih malih;

Pawos 14

- (1) Swadharmaning prajuru ring desa:
- Ha. Pamucuk desa:
- 1) Nguwehin tatimbang ring prajuru desa, yadiastun prajuru punika nunas tatimbangan utawi nenten nunas tatimbang;
 - 2) Ngarencanayang tur niwakang pamutus indik sahanan pewanungan sane pacang kalaksanayang ring desa.
 - 3) Ngangkat lan ngraryanang prajuru desa;
 - 4) Mawosang kalih niwakang pamutus marep ring wicara warga desane;

- 5) Ngawentenang laporan ring krama desane sapari indik pembangunan ring desa, lan asapunika taler sapari indik pelaksanaan awig-awig desane;

Na. ^{Basahite} Prajuru desa:

- 1) Ngelaksanayang sahanan rencana wewangunan desane sane sampun kasusun/kaputusang olih Pamucuk Desa;
- 2) Ngawentenang laporan marep ring pamucuk desa indik sapemargin wewangunan ring desa, lan asapunika taler indik pelaksanaan awig-awig desane;
- 3) Ngenterang pamargin sadaging awig-awig muah pamutus Pamucuk lan Pararem desa;
- 4) Nuntun tur ngenterang krama desa ngupadi manut patitis;
- 5) Ngenterang indik pamargin upakara/upacara, ring pura manut dresta;

Ca. Klihan Desa Adat:

- 1) Dados Panua Pamucuk Desa;
- 2) Nuntun saha nyaksinin tata cara ngelingang pakulawargan;
- 3) Ngenterang panglaksanaan sadaging awig-awig miwah pamutus-pamutus krama desa sane sinanggeh pararem;

- 4) Mimpin prajuru desa taler mimpin sahanan paruman-paruman krama desa, paruman pamucuk desa lan paruman-paruman prajuru desa;
- 5) Ngraksa miwah nudonang tata titine migunayang padruwen desa;
- 6) Mawosin miwah niwakan pamutus marep ring wicara krama;
- 7) Nyelidihi (ngawakilin) desa ngawentenang paruman babawos ring sapa sira ugi;
- 8) Nyobyahang ring krama desa prade Prajuru ring desa sampun telas sengkernya. Siaran punika kamargiang tigang sasih sadereng sengkernya;
- 9) Nuntun saha nyaksi upacara sangaskaraning kahuripan sane mabuat;

Ra. Klihan Desa tan kengin malih kadadosang prajuru ring banjar nyane;

- (2) Prajuru ring desa sane wawu kaadegang patut matur piuning ring Kahyangan Tiga. Taler asapunika risampune puput/wusan ngalaksanayang swadharman nyane dados prajuru ring desa;

Pawos 15

Petias Prajuru Desa:

Ha. Prajuru Desa luput papeson reramon ka desa;

Na. Klihan Desa lan Klihan Banjar suka duka luput papeson raramon
lan artha brana ka desa;

Pawos : 16 → 71-20.50p

- (1) Prajuru Desa kagentosin riantukan: ✓
Ha. Sampun manut senger nyane;
Na. Seda / Lina;
Ca. Pinunas ngraga;
Ra. Kanorayang antuk krama desane manawita ngawetuang
biyuta;
- (2) Ngarariyanang prajuru ring desa mangda sajeroning paruman
Pamucuk desa tur kasiarang/kasobyahang ring krama desane;
- (3) Prajuru sane kararianang sakadi menggah ring aksara ra, ring
ajeng tan kengin kawaliang malih;

Palet : 3

Indik Paruman → 71-20p

Pawos : 17

- (1) Paruman ring desa Adat Padang Luwih wenten 7 soroh, inggih
punika:
Ha. Paruman krama desa;
Na. Paruman pamucuk desa;
Ca. Paruman prajuru desa;

- Ra. Paruman banjar;
- Ka. Paruman prajuru banjar;
- Da. Paruman para pamangku;
- Ta. Paruman Daa Teruna;
- (2) Indik paruman inucap ring ajeng kawentenang manut pararem;
- (3) Sahanan paruman madudonan sakadi ring sor :
- Ha. Prasida lumaksana risampun karawuhin antuk saparo langkung asiki olih sane patut nyarengin parum. Sakewanten indik paruman Pamucuk desa ngeniang saparindik nguwah nguwuhin awig-awig, manut sakadi munggah ring pawos 77 ring unkur;
- Na. Mabusana nyalempot;
- Ca. Tan maren kamanggala antuk ngarcana ring Ida Sang Hyang Widhi Wasa maka sarana canang sari utawi cane;
- Ra. Pamutus kautsahayang malarapan antuk gilik saguluk;
- Ka. Tan kalugra ngawetwang suara ghora utawi byuta, yan wenten asapunika keni pamidanda bea pecamil kadi dandaning nguman-uman ring sabha;

Palet 4

Indik Kukul

Pawos 18

- (1) Kukul ring Desa Adat Padang Luwih wenten kalih soroh:
 - Ha. Kukul Pura Kahyangan Tiga magenah ring Pura soang-soang;
 - Na. Kukul Banjar Adat magenah ring banjar soang-soang;
- (2) Kukul Pura Kahyangan Tiga katepak ritatkala wenten upacara-upacara ring Pura inucap tur suaranya nungtit;
- (3) Tabuh tatepakan kukul ring banjar suka duka:
 - Ha. Tengeran tedun ayah, suaran kukul dabdab (tabuh kalih) patch sakadi tengeran paruman manut dresta;
 - Na. Tengeran ka panca bhaya suaran ipun bulus minakadi:
 - 1) Geni bhaya: suaran kukul bulus tan papegatan (ngebang);
 - 2) Artha bhaya (kamalingan): suaran kukul bulus tigang tulud;
 - 3) Wenten jadma ngamuk: suaran kukul bulus mawali wali risampun kukul bulus yen wenten suaran kukul tabuh alon (sakadi 3.ha) nyobyahang pakaryane sampun puput;

- 4) Wenten linuh, bulan kepangan, matanai kepangan: suaran kulkul ngompang;
- 5) Wenten sinalih tunggil krama banjar seda: suaran kulkul nungkak;

Pawos 19

Kulkul Banjar suka duka tan wenang katepak yening tan sangkaning pituduh prajuru, sajawaning ke panca bhaya manut ring ajeng, sang nepak tan sangkaning pituduh, patut digelis atur supekta maka buatan panepake, yan tan asapunika kadanda manut pararem, asapunika taler yan nepak tan manut wiguna, kadanda manut pararem;

Pawos 20

- (1) Sahanan Kulkul banjar suka duka wawidangan Desa Adat Padang Luwih katepak prade wenten sinalih tunggil kulkul banjar suka duka sajeroning Desa Adat Padang Luwih wiyadin desa Adat pangadin nyihnayang tengeran ka panca bhaya;
- (2) Tengeran kapanca bhaya patut katedunin antuk sahanan ayahan saha gagawan manut rupan bhayane;

Palet : 5

Indik Druwen Desa - 24

Pawos : 21

Padruwen Desa Adat Padang Luwih sakadi ring sor:

(1) Pura:

Ha. Kahyangan desa, sakadi Pura Kahyangan Tiga jangkep sakeluwir busanannya;

Na. Pura siosan ring Kahyangan Tiga/Kahyangan Desa, kawiwenang olih panyungsungnia tur kaayomin olih Desa Adat Padang Luwih;

Ca. Indik kawentenan pura-pura punika kamunggahang ring lepihan awig-awih puniki;

(2) Laba-laba druwen Pura;

Ha. Pura Desa/Puseh:

1) Palemahan : 0,1568 ha; *Tegal puseh laura* 1. 4.477,94 m² sakel

2) Laba sawah : 0.7125 ha = 7125 m² ring subak Gaji; *2. 7.125 m² kempiki*

0.505 ha ring subak Gaji; *3. 685 m² sakel*

3) Tegalan : -

Na. Pura Panataran ring Tegaljaya:

1) Palemahan : 0,4815 ha;

2) Laba sawah : 0.43 ha ring subak Muding;

4. 200 m²
2. 3.915 m²
3. 200 m² Gaji
4. 5.150. Canggih
0.43 m² sakel

- 0.57 ha ring subak Dawa;
- 0.20 ha ring subak Gaji;
- 0.32 ha ring subak Muding;
- 0.11 ha ring subak Gaji;
- 3) Tegalan : 0.40 ha ring Br. Tegaljaya;

Ca. Pura Kahyangan Celuk :

- 1) Palemahan : 0,2016 ha;
- 2) Laba sawah : 0.26 ha ring subak gaji, Muding
- 3) Tegalan : 0.07 ha ring Br. Celuk;

Ra. Pura Kahyangan ring Tegaljaya

- 1) Palemahan : Dados asiki sareng Penataran;
- 2) Laba sawah : -
- 3) Tegalan : -

Ka. Pura Penataran /Kahyangan ring Kuwanji:

- 1) Palemahan : 0, 1731 ha;
- 2) Laba sawah : 0, 44 ha;
- 3) Tegalan : -

Da. LPD utawi Lembaga Perkreditan Desa;

- Ta. Setra-setra Desa Adat Padang Luwih:
- 1) Setra ring Dalem Kahyangan Celuk : 0, 1632 ha;
 - 2) Setra ring Dalem Kahyangan Kuwanji : 0, 1071 ha;
 - 3) Setra ring Dalem Kahyangan Tegaljaya : 0, 758 ha;
- (3) Pangemong lan genah soang-soang Pura inucap:
- Ha. Pura Desa-Puseh magenah ring Pendem, kaemong antuk Desa Adat (banjar Kuwanji, Gaji, Jeroan, Celuk, Pendem, Tegaljaya);
- Na. Pura Panataran magenah ring Tegaljaya, kaemong antuk Desa Adat (Banjar Gaji, Jeroan, Pendem, Celuk, Tegaljaya);
- Ca. Pura Kahyangan Tegaljaya magenah ring Pura Panataran ring Tegaljaya kaemong antuk banjar Tegaljaya;
- Ra. Pura Kahyangan Celuk magenah ring Celuk kaemong antuk banjar Gaji, Jeroan, Pendem, Celuk;
- Ka. Pura Kahyangan Kuwanji magenah ring Pura Tibung Kuwanji kaemong antuk banjar Kuwanji;
- Da. Pura Panataran (Linggih Panataran) ring Kuwanji magenah ring Pura Tibung Kuwanji kaemong antuk banjar Kuwanji;
- (4) Setra setra ring Desa Adat Padang Luwih wenten tigang genah Iwire:
- Ha. Setra ring Tegaljaya kaempon olih Banjar Tegaljaya;

Na. Setra ring Celuk kaempon olih Banjar Gaji, Jeroan,
Pendem, Celuk;

Ca. Setra ring Kuwanji kaempon olih banjar Kuwanji ;

(5) Piranti-piranti desa luire:

Ha. Wewangunan ring pura Desa/Bale Agung ;

Na. Wewangunan ring Pura Puseh ;

Ca. Wewangunan ring Pura Dalem minakadi Dalem Kahyangan,
Panataran;

Ra. Wewangunan ring Beji saha margi ka beji ring Gaduh;

(6) Tatangunan "Barong" ring Tegaljaya druwen Pura Kahyangan
ring Tegaljaya kaempon olih banjar Tegaljaya;

(7) Bale banjar, kulkul suka duka sane wenten ring soang-soang
banjar sawewidangan Desa Adat Padang Luwih inggih punika
druwen banjar suka duka soang-soang;

Pawos : 22

(1) Kawigunan tanah laba pura inucap ring ajeng pamuponiya
kaanggen prabeya mecikang wewangunan lan pangaci ring Pura
inucap, sakirangniya krama desa ngurunin manut pararem;

(2) Druwen desa tan kengin kaadol, katukar, utawi kagadeang sajaba
sampun kararemin antuk krama desa;

Pawos : 23

- (1) Prajuru desa wenang ngetangang pamupon palaba lan sapanunggiling druwen desa;
- (2) Nyabran paruman ring desa, prajuru desa patut nyiarang parindik munjuk lungsur ring druwen desa antuk ilikita pastika;

Palet 6

Panyanggra Banjar

Pawos: 24

- (1) Ritatkala ngewangun karya suka kengin nunas panyanggran banjar manut ring pararem banjarnya soang-soang;
- (2) Panyanggran banjar punika manut dresta miwah pararem banjarniya soang-soang, saha manut pangelogika agung alit karyane tur mangda katureksaian olih prajuru banjar;
- (3) Ritatkala ngewangun yadnya duka patut nunas panyanggran banjar sakadi ring sor:

Ha. Seda kalanturang antuk prateka mapendem:

- 1) Krama banjar patut nyanggra karyane gumanti patut mapendem. Rikala ngambil karya punika, taler ngaryanin bale balean, krama banjar tan polih sangu;
- 2) Krama banjar ngamedalang patus marupa beras 1 kg. Tukang banten mangda kautsahayang tukang sane sampun polih pituduh saking prajuru desa;

- 3) Banten upakara mangda nganggen sakadi sane munggah ring lepihan awig puniki;

Na. Seda kalanturang antuk prateka ngaben pramangkin (nadak utawi ngidih olas):

- 1) Krama banjar patut nyanggra karya punika gumanti puput mageseng lan nganyut. Rikala ngambil karya punika, taler ngaryanin bale balean, krama banjar tan polih sangu;
- 2) Krama banjar ngamedalang patus marupa: beras 1 kg, kelapa asiki, saang lan busung manut pararem. Tukang banten kautsahayang tukang sane sampun polih pituduh saking prajuru desa;
- 3) Banten upakara mangda nganggen sakadi sane munggah ring lepihan awig puniki;

CA. Seda kalanturan antuk prateka ngaben mekelin:

- 1) Krama banjar patut nyanggra karya punika, gumanti puput mageseng lan nganyut;
- 2) Rikala ngambil karya punika, taler ngaryanin bale-balean, krama banjar polih sangu;
- 3) Krama banjar ngamedalang patus marupa 1 kg, kelapa asiki;

4) Indik tukang banten lan banten upakara kasukserah ring sang sane madruwe karyane;

RA. Seda kalanturang antuk prateka ngaben ngawangun (padewasan). Krama banjar patut nyanggra karya punika gumanti puput mageseng lan nganyut:

1) Rikala ngambil karya punika krama banjar polih sangu;

2) Krama banjar ngamedalang patus marupa : beras 1 kg. Tukang banten lan banten upakara kasukserah ring sang sane madruwe karyane;

KA. Ngaben ngerit ;

Ngaben ngerit kalaksanayang sakirang-kirang ipun nyabran 10 warsa. Ritatkala ngaben ngerit utawi nyekah ngerit kengin nunas panyanggran banjar, utawi karya punika kagamel antuk kaluarga kaluarga sane ngerit kewanten. Indik tukang banten lan banten upakara kasukserah ring sang sane madruwe karyane;

SARGAH PAT

SUKERTA TATA AGAMA

Palet 1

Indik Dewa Yadnya

Pawos 25

(1) Palinggih panyiwian Desa Adat Padang Luwih luwire:

- Ha. Pura Kahyangan Tiga (Pura Desa, Puseh, Dalem Kahyangan lan Pura Panataran);
- Na. Pura-pura sane siosan, sane wenten ring wawidangan Desa Adat Padang Luwih, taler kaayomin antuk desa adat. Pura pura inucap magenah ring lepihan awig-awig puniki;
- (2) Rahina piodalan / tetoyan ring pura pura inucap ring sor:
- Ha. Pura Desa lan Pura Puseh rikala Soma Kliwon wuku Kuningan (Pemacekan Agung);
- Na. Pura Dalem Panataran, Pura Kahyangan ring Tegaljaya lan Pura Kahyangan ring Celuk rikala Sukra Paing Wuku Dungulan;
- Ca. Pura Kahyangan ring Kuwanji, Pura Panataran ring Kuwanji rikala Redite Kliwon wuku Pujut;
- Ra. Pura pura sane siosan sane wenten ring wawidangan Desa Adat Padang Luwih kasukserah ring krama pangemponniya/pangemongniya;
- (3) Panemayan patirtan (Piodalan / ring Pura Kahyangan Tiga ngenem sasih;
- (4) Ritatkala patirtan utawi piodalan ring Pura Kahyangan Tiga pamangku ring pura inucap lampus, piodalan tetep mamargi sakadi biasa lan piodalan punika kamargiang olih banjar sane tan keni sebel;
- (5) Pangaci sane siosan:

- Ha. Rikala purnamaning sasih Kapat Desa Adat Padang Luwih patut ngaturang pangaci masalaran utawi banten pasalaran ring Dewa Rare Angon sane malinggih ring Pura Desa. (matimpugan ketipat bantal);
- Na. Rikala purnamaning sasih Kadasa ngusaba Dewa Nini ring Pura Desa;
- Ca. Rikala Buda Kliwon Matal ring Pura Desa, Puseh, Kahyangan Celuk, Pura Panataran Tegaljaya ngaturang pepranian;
- Ra. Rikala sasih Kasanga ring pura Dalem Panataran, Kahyangan Tegaljaya ngaturang pacaruan Celeng Butuhan;
- Ka. Rikala Redite Kliwon Watu Gunung ring Pura Panataran lan Kahyangan Kuwanji ngaturang paperanian;
- Da. Tatoyan/pangaci ring Pura Kahyangan Tiga nista, madia, utama manut kawentenan lan pararem; *— tip note*
- Ta. Mitegepang pangaci kamedalang olih krama banjar/desa manut sakadi sane sampun mamargi, wiyadin pararem;
- Sa. Pangaci pangaci sane dereng menggah sakadi ring ajeng kaenterang/kaatur olih prajuru desa;

Pawos : 26

Soang-soang Pura inucap ring ajeng kawentenang Pemangku.

- (1) Tata cara ngadegang Pamangku manut sakadi ring sor:
 - Ha. Nyanjan (nunas pawuwus Widhi) wiadin;
 - Na. Warisan pamangku (senātana Pamangku);
 - Ca. Kapilih antuk Banjar/Desa madasar antuk lekesan;
- (2) Sane tan wenang kaadegang pamangku inggih punika warga sane:
 - Ha. Cedangga luwire: peceng, perot, cungh lan sapanunggilan ipun;
 - Na. Kageringan: sakit ila, ayan, buduh wiadin;
 - Ca. Sane lianan manut pararem;
- (3) Prabeya ngawentenang pamangku lanang/istri Pura Kahyangan Tiga kamedalang antuk krama desa Adat Padang Luwih. Rikala kapatiannya riwekas mangda kapitra yadnya sanistane sawa prateka (ngaben pramangkin) kewenten olih kaluarganiya;
- (4) Krama desa adat nyanggra antuk papatisan, manut pararem;

Pawos 27

Sasaran Pamangku Kahyangan Tiga soang-soang sakadi ring sor:

- (1) Ngaryanang aturan nemoning Purnama, Tilem miwah Kajeng Kliwon, pererainan-pererainan;
- (2) Ngraksa saha miara pralingga miwah busana pura soang-soang;

- (3) Nyadokang ring prajuru desa adat wenten busana pura sane rusak, palinggih sane rusak tur karusakane sane tiosan ring pura soang-soang.

Prajuru patut kagentosin manut panglogika;

- (4) Tegenan inucap manut penglogikan prajuru;

Pawos 28

Swadharmaning Pamangku:

- (1) Ngenterang upakara piodalan ring Kahyangan Tiga, utawi ring pura pura sane siosan;
- (2) Ngaturang panawuran-panawuran sinalih tunggil krama desa lan warga dura desa;
- (3) Nitenin, nuntun kasucian Kahyangan Tiga;
- (4) Tiosan ring punika pamangku patut masadok ring prajuru mangda kailikitayang tur kaanggehang druwen desa prade wenten:
- Ha. Panawuran upakara lan wawalen;
- Na. panawuran leluwes, mule-mule;
- Ca. Panuwuran sasari-sasari ritatkala tatoyan ring Kahyangan Tiga;
- Ra. Sajawaning panuwuran sane mawali kalungsur, kapuputang antuk pamangku kewanten;

- (5) Muputang yadnya nista miwah madia kengin ngulemang pamangku Kahyangan Tiga. Yening mautama yajnyane kengin nuwur sang sulinggih, pacang muput piodalan inucap, lan Pamangku minakadi panyanggra;
- (6) Pamangku Kahyangan Tiga kengin:
- Ha. Nibakang panugrahan ring pamangku prasanak, panyarikan pura, lan krama desa manut pararem;
- NA. Polih panampa rikala ngamargiang puja wali saking wargan dane mangku, juru canang, panyarikan pura;
- CA. Pamangku Kahyangan Tiga polih panyepuhan yening kadalih antuk sinalih tunggil krama desa nanging dalih punika tan mabukti kaiwanganniya. Yening mabukti kaiwanganniya, patut nyapuhin raga antuk prabeya ngaraga;

Pawos 29

Olih-olih (petias) Pemangku Kahyangan Tiga:

- HA. Sarin canang pangulemen, sarin canang tiosan ring tatoyan, sarin panawuran (sesangi), tiosan ring tatoyan Kahyangan Tiga;
- NA. Pamangku Kahyangan Tiga luput ayah lan papeson ke desa, asapunika taler polih luput ayah ka banjar suka dukanya, nanging papeson ring banjar tetep keni sakadi krama banjar sane biasa;
- CA. Patias sane tiosan manut pararem;

Pawos 30

Pamangku kagentosin riantukan:

- (1) Seda;
- (2) Pinunas ngaraga, manawite kageringan;
- (3) Nilar sasana, malaksana asta dusta (upami anayub cor);
- (4) Prade kacihnayang pamangku ngalap rabi, patut mararian dumun masengker 42 rahina, wusan punika patut nyuciang raga sareng rabine antuk prabeya ngraga. Yening pamangku balu, prade ngalap rabi malih, prabeya pasucian inucap polih saking Desa Adat Padang Luwih;

Pawos 31

Rikala piodalan ring pura-pura:

- (1) Krama sane pedek tangkil ngaturang bakti patut mabusana tegap (wastra, kampuh, maumpal, lan destar);
- (2) Rikala tatoyan ring Pura Kahyangan Tiga pamucuk ayah sajeroning wali, saking banjar manut pagilir patut tangkil ngarentebang tatoyan ring pura inucap;
- (3) Krama banjar sane siosan mangda carem rawuh ngaturang bakti, pedek tangkil kapura kaetangan antuk prajuru banjarniya (malarapan antuk suaran kulkul);
- (4) Prade muspa mangda tragia makta sarana/eteh-eteh muspa;

(1) Tan kalugra ngranjing ka pura :

Ha. Sang kacuntakan sangkaning sebel raga utawi kalayuan.

Sebel raga luire:

- 1) Sebel kandel (ngaraja swala) salami dereng mabersih;
- 2) Sebel madruwe oka salami 42 rahina;
- 3) Sebel pangantenan salami dereng mabyakala;
- 4) Sebel kalayuan/pitra yadnya ;

Na. Makta sahanan barang sinanggeh ngaletchin;

Ca. Sato agung/wawalungan, sajawaning rikala mapepada (lakar upakara);

Ngapogap anangher

(2) Parilaksana sane tan wenang ring Pura:

Ha. Masumpah / anayub cor sajawaning pituduh prajuru;

Na. Makobetan (maiyeagan), masesenengan, jajudian, mapunyah-punyah, makolem dados asiki lanang istri lan mabacin;

Ca. Mungghah tedun palinggih sajawaning pituduh pamangku wiyadin prajuru;

Ra. Ngamargiang tirta, sajawaning pamangku utawi panyarikan pura (panyade), sang sulinggih;

Palet : 2

Indik Rsi Yadnya

Pawos 33 - 42

Sang pacang mapodgala (madwijati/mabersih) sajawaning nunas panugrahan ring sang rumawos (Parisada utawi Kantor Agama Hindu) patut nginutin :

- (1) Patut taler masadok ring prajuru Desa Adat Padang Luwih;
- (2) Prajuru inucap patut sareng nureksain, nitenin, mangda sulur kalih pamargi yakti-yakti manut kecaping agama, makadi tan kacedaangga (madasar antuk keterangan dokter wiyadin ilikita saking mawang rat), saha sareng nyaksinin pamargin upacara;
- (3) Sapupute upacara, prajuru desa patut digelis ngentosin sang didiksa ring sahanan ilikita antuk biseka kawikon manut panugrahan nabene, saha kasiarang ring paruman ring desa/banjar;

Pawos 34

- (1) Pamangku Kahyangan Tiga patut mawinten. Upakara lan upacara ipun kaetangan antuk prajuru desa;
- (2) Sajawaning pamangku Kahyangan Tiga, sang pacang mawinten ngamargiang kapamangkuan, saha maka buatannyane pacang mamargi nyonteng, dalang, utawi sakeluwir pacang ngenterang yadnya patut:

- Ha. Masadok ring kelian Desa Adat Padang Luwih;
- Na. Prajuru patut ngawas, nitenin tur naweng/ngalangi prade kacihnayang sasar kakecap miwah kadrestane, tur sareng nyaksiang upacara upakara selanturnyane;
- Ca. Sasampune upacarane puput prajuru patut nyiarang ring paruman desa tegep rawuhing wates kawenangan sang inucap ring ajeng ngamargiang yadnya;
- (3) Sane wenang ngawentenang sakancan sane munggah ring ajeng inggih punika sang sulinggih;

Pawos 35

- (1) Krama desa/banjar katuntun antuk prajuru, sareng ngawas nitenin mangda sahanan yadnya sane kawentenang kaicen pamuput olih sang sulinggih utawi sang sujana (mangku, dalang, sakaluwire) manut kawenanganniya soang-soang);
- (2) Prajuru patut nuntun saha manggala krama desane mikukuhin kasucian linggih para sulinggih, pamangku, ring wewidangan Desa Adat Padang Luwih;
- (3) Ngaturang dana punia manut agung alit karyane; *Rup Rup Madus jati*
- (4) Saking ateleb mapiserep pawarah pawisik lan pustaka suci pakaryan Ida Para Rsi;

Palet : 3

Indik Pitra Yadnya

Pawos 36

- (1) Sahanan upakara mrateka sang huwus lampus kabawos pitra yadnya;
- (2) Pitra yadnya matetuwek ngawentenang yadnya pinaka bakti swadarmaning putra sasana ring skala niskala lan swadarmaning sang sane maurip marep ring sang sane lampus;
- (3) Pangupakara sang sane lampus:
 - Ha. Rare sane lampus sadereng kepus udel rawuhing mayusa 42 rahina tsan dados kaabenan sawireh kantun maawak suci; *Ngil arbei*
 - Na. Rare sane mayusa lintang saking 42 rahina rawuhing saderenge ketus untu dados kaabenang mawasta nglungah;
 - Ca. Menawi sampun ketus untu rawuhing wreda dados kaabenang;
- (4) Upacara upakara riwusan ngaben mawasta upacara upakara ring pitara pitari (Batara Batari) utawi mamukur (nyekah);

Pawos37

- (1) Swadarmaning tategenan prade wenten sinalih tunggil krama desa lampus, sang kaduhkitan (sang sane madruwe alang), patut:
 - Ha. Nyadokang ring prajuru banjar tur nunas tatimbang sapari indik kawentenaniya (pedewasan);

Na. Ngaturang ring banjarniya prade ka pendem utawi kaabenang;

(2) Swadarmaning banjar/desa:

Ha. Prajuru banjar maritetes pamargin sang kaduhkitan napi pacang kapendem utawi kaabenang sawane;

Na. Nepak kulkul banjar manut pawos 18 ayat 3, na. ring ajeng;

(3) Panyanggran banjar selanturnia:

Ha. Soang-soang krama banjar nedunang patis manut pararem;

Na. Krama banjar lanang istri ngambil karya manut dresta miwah ngromba rikala pakutangan, saha soang-soang mabusana adat (lanang istri sanistane nylempot);

Ca. Pamargin sawa miwah upakaraniya mangda dabdab, antar lan kengin masuara gora (ngarap watang);

Ra. Prade mamurug kadi inucap ring ajeng (ca.3) katur ring prajuru banjar/desa adat tur katibakang pamidanda manut pararem;

Ka. Prade wenten krama balu nglisting sane lampus (mati) mangda kaupakara olih banjar, saha tata upacaranya manut dudonan;

(4) Prade sawane melelet/masekeh:

Ha. Nglelet/nyekeh sawa mapewaneng salami 42 rahina;

- Na. Prade tan kasidan ring panemayania inucap mangda kawentenang pasadok ring prajuru banjar/desa adat;
- Ca. Mungguwing pagebagan manut paetengan prajuru banjar soang-soang;

Pawos 38

- (1) Tan kalugra ngutang sawa ritatkala rahina:
- Ha. Rikala Galungan, Kuningan, Nyepi lan Saraswati;
- Na. Rikala Ida Batara Kahyangan Tiga ngadeg ring Bale Agung;
- Ca. Rikala tatoyan/piodalan ring Pura Kahyangan Tiga;
- Ra. Makirim ring sajeroning Pura Dalem Kahyangan (Kahyangan Asiki);
- (2) Pamargin pakutangan tan kalugra sakadi ring sor:
- Ha. Ngalangkar watang .
- Na. Makajang watang ;
- Ca. Makirim watang sajeroning tunggal setra;
- (3) Prade wenten alang sakadi ring ajeng (No. na. 1,2,3,) dados makutang ka setra siosan sawidangan Desa Adat Padang Luwih:
- Ha. Yening wenten warga desa seda tur upakaraniya sampun puput raris wenten malih warga desa siosan seda mangda tan kaucap ngalangkar watang, dados ipun sane kapialang ungkuran tan kengin nyuarayang kulkuł banjar sadereng pakutangan watang sane pinih riin mamargi; *— e Supunapi watangi ?*

- Na. Yening wenten warga desa seda nemoning piodalan ring pura siosan ring Kahyangan Tiga, mangda piodalan punika kapuputang riyin. Sasampune upacara piodalan puput rahina ugi Ida Batara ngelukar/masimpen tan nyejer malih;
- (4) Tan kalugrayang mendem wiadin ngeseng watang tiosan ring setra, sajawaning sulinggih. Upaminipun ring pakarangan paumahan, tegal, carik lan sapanunggalanipun, yadiastun genah punika druwen sang sane kapialang;
- (5) Kalugrayang makutang manut paetangan:
- Ha. Rare during kepus udel rawuhing ring rare mayusa 42 rahina tan wenang ka pendem rikala Kajeng Kliwon;
- Na. Pakutang/mendem/ngeseng rikala wenten piodalan (pura siosan ring Kahyangan Tiga), rarahinan, dados kamargiang sasampune kabawos galah dadi, manut tata cara sane sampun mamargi;
- Ca. Yening wenten sang dura desa utawi sane tan makrama desa sane maagama Hindu ka pendem/ka geseng ring setra Desa Adat Padang Luwih, kakenain pananjung batu (prabeya paleletuhan) manut pararem;
- Ra. Yening matempung ngaben, soang-soang sawa kakenanin pananjung batu (prabeya paleletuhan) manut pararem;

Pawos 39

- (1) Prade lampus sangkaning salah pati, ulah pati, werat pati, kabengawan lan sakancanipun, kengin kabakta budal ka umah nyane, tur dados kaprateka ^{ti patuta} kadi patut, risampun kamanggala antuk upakara banten panebusan lan pangulapan;
- (2) Sang lampus sangkaning sakit ila (gering agung), wiadin sakit sane ngelalahin tiosan, risampun kaupakara manut ring ajeng patut kageseng ring setra;
- (3) Prade wenten sinalih tunggil krama ngerobang kaluarga sane sakit ila, sakit tiosan sane ngelalah, sadereng sang kageringan lampus patut digelis kasadokang ring prajuru miwah mapitiba jampi usada dokter. Yening mamurug mawastu gering inucap ngelalahin, sang sane ngerobang kadanda manut pararem;
- (4) Sawa daa/teruna patut ngangge rurub putih kuning;
- (5) Yening dereng mapandes mangda sawane katatah riyin, wawu kengin kaabenang utawi kapendem;
- (6) Prade wong istri lampus ngadut manik, tan wenang kapendem/kageseng saderenge bobotane embas, yadiastun maurip utawi padem bobotane punika. Mangda bobotane digelis embas pinih becik katur ring dokter mangda kabedah. Yening dokter sampun ngicenning pastika bobote/manike punika tan patut kaembas, upacara kapendem/kageseng dados kamargiang;

- (7) Sahanan wong lampus ring pakarangan, tegalan, carik patut sang sane madruwe sawa punika ngupakarain genah inucap sepatutipun;

Pawos 40

Mungguwing kacuntakan (sebel) ring babanjaran lan pakulawargan sakadi ring sor:

- (1) Saking babanjaran salami tigang rahina, ngawit saking pakutangan yadiastun sawane kapendem utawi kaabenang pramangkin;
- (2) Saking sulur pakilitan pakulawargan tunggal pamerajan salami 12 rahina ngawit saking pakutangan, wawu kawastanin buntas sasampune makelud/nyepuh;
- (3) Sakewanten prade ngawangun yadnya, sawane mangda kaprateka matirta pangentas saha makekelud/nyepuh sadereng 12 rahina;
- (4) Prade wenten Krama bobot tur karuron, dewekipun keni sebel salami 12 rahina;
- (5) Mungguing wenten pangeritan (ngaben ngerit) keluarga inucap keni sebel ngawit saking ngendag, lan 12 rahina saking pakutangan manawi babanjaran ipun tetep keni sebel salami 3 rahina ngawit saking pakutangan;
- (6) Sane tan keneng cuntaka inggih punika:
 - Ha. Sang sulinggih;
 - Na. Pamangku Kahyangan Tiga;
 - Ca. Rikala ngewangun yadnya sane kabawos galah dadi;

Pawos 41

- (1) Atiwa-tiwa (pangabenan) wenten kalih soroh:
- Ha. Nyawa resi (Nyuwasta geni).
Nyawa resi kalaksanayang antuk pangawak lalang, dawning tan ngagah sawa utawi sawane tan kakeniyang;
 - Na. Sawa prateka .Sawa prateka kalaksanayang antuk ngagah galih, utawi mreteka sawa bah bangun;
- (2) Dudonan pangabenan sakadi ring sor:
- Ha. Ngaskara antuk ngagah utawi nyawa resi;
 - Na. Pakutangan antuk ngeseng sawa;
 - Ca. Nyekah/mamukur;

Pawos 42

- (1) Panumaya ngaben utawi nyekah ngerit kalaksanayang sakadi magenah ring pawos 24 ayat 3 ha, na, ca, ra, ka;
- (2) Upakara panebas tirta ring Kahyangan Tiga nista madia utama sakadi ring sor:
- Ha. Prade wenten mapendem ngaben pramangkin (nadak/ngidih olas) utawi ngaben ngerit upakara panebas tirta sakadi menggah ring lempiran awig-awig puniki;
 - Na. Prade wenten ngaben mekelin upakara panebas tirta sakadi menggah ring lempiran awig-awig puniki;

- Ca. Prade wenten ngaben ngawangun upakara panebas tirta sakadi menggah ring lempiran awig-awig puniki;
- (3) Ngaben pramangkin (nadak/ngidih olas), mapendem, upakaranipun sanistane sakadi menggah ring lepihan awig-awig puniki;
- Pawos 43* (4) Ngaben ngerit, nyekah ngerit, ngaben mekelin lan ngaben ngawangun upakaran ipun manut dresta;

Palet 4

Indik Manusa Yadnya

Pawos 43

- (1) Manusa yadnya inggih punika upacara-upacara dharmaning manusa ngawit saking panyucian mapawarangan, ngantos kamargiang upacara pawintenan;
- (2) Upakara ring ajeng madudonan sakadi ring sor:
- Ha. Magedong-gedongan duk pangerempinian belingang. Upakara sane sampun ketah kamargiang inggih punika "Maca Adhi";
- Na. Duk sang kamareka (rare) wawu medal;
- Ca. Kepus udel;
- Ra. Ngalepas aon (risampune rare mayusa 12 rahina);
- Ka. Akambuhan (rare mayusa 42 rahina);
- Da. Tigang sasih (ngangkid, nyambutin, mapetik);

- Ta. Paweton risampune mayusa 6 bulan;
 - Sa. Ngempugin rikala wawu tumbuh untu;
 - Wa. Makupak/maketus upakara sasayut pangerti suara;
 - La. Menggah daa teruna (ngaraja suwala wadone, ngembakin lanange);
 - Ma. Mapandes/matatah;
 - Ga. Mawinten/madengen-dengen ring pagriastane;
 - Ba. Mawinten nunas panugrahan Sang Hyang Saraswati;
- (3) Upacara upakara soang-soang ring ajeng nista madia utama, nganutin sastra agama miwah catur dresta maka buatan desa drestane, ngawinayang sima/cara banjar/Desa Adat Padang Luwih;
 - (4) Upakara pawintenan manut sakadi pawos 34 ring ajeng, miwah upakara pawiwahan manut pawos 47;
 - (5) Upacara upacara atiwa-tiwa manut sakadi pawos 41 lan pawos 42 ring ajeng;

Palet 5

Indik Bhuta Yadnya

Pawos 44 - 50

- (1) Bhuta yadnya inggih punika upacara upakara pabyakalan ring pertiwi lan kahyangan, sarwa prani, sarwa lelandepan, wawalian, saha upakara ring babutan;
- (2) Upakara-upakara pabyakalan ring sarwa prani:

- Ha. Tumpek Pangarah/Pangatag nemoming Saniscara Kliwon Wuku Wariga, upakara majeng ring sarwa tumuwuh;
- Na. Tumpek Andang/Uye nemoning Saniscara Kliwon wuku Uye upakara majeng ring sarwa ingon-ingon;
- Ca. Upakara-upakara pakalan-kalan manusa, manut wiguna ketah kabowos pabyakalan;
- (3) Upakara-upakara sarwa lelandepan, wawalian, nemoning Saniscara wuku Landep (tumpek landep);
- (4) Upakara upakara ringgit nemoning Saniscara Kliwon wuku Wayang;
- (5) Upakara upakara pabyakalan ring pertiwi, kahyangan lan bebhutan kawastanin macaru;
- (6) Pacaruan inucap nista madia utama manut wiguna sakadi ring sor:
- Ha. Eka sata (antuk ayam asiki tur malayang-layang);
- Na. Panca sata (antuk ayam lalima tur malayang-layang);
- Ca. Rsi Gana;
- Ra. Panca Kelud;
- Ka. Panca Sanak (antuk ayam brumbun asiki nenten malayang-layang);
- Da. Tawur Kasanga;
- (7) Masegeh manut genah muah rarahinan;
- (8) Yadnya Sesa (jotan) masaiba nyabran rahina wusan ngerateng;

Pawos 45

Upacara tawur Kasanga sakadi ring sor:

- (1) Rikala tilem kasangan patut ngawentenang tawur kasanga saha raruntutan upacara upakara manut dresta minakadi:
 - Ha. Ida Bhatara nyajan ring Bale Agung;
 - Na. Ida Bhatara Melasti ka segara;
 - Ca. Rawuh saking melasti nyejer ring Bale Agung;
 - Ra. Tawur kasanga miwah upacara upakara sane siosan sane sampun ketah mamargi;
- (2) Upakara ring desa kaetengan olih prajuru desa, kasanggra antuk prajuru banjar;
- (3) Pidaging upakara ring banjar kakaryaning antuk banjar kaetangan antuk prajuru banjar;
- (4) Wali tatabuhan manut pagilir, asapunika taler nyongsong joli jempana ka sagarane manut pararem;
- (5) Sajawaning juru songsong, juru tedung, juru banderang, prajuru banjar pamucuk ngarapan upakara, miwah krama banjar sane ngamedalang tatabuhan, krama banjar siosan patut ngiring melastiang Ida Bhatara, tur prade cedok tan kapiambeng keni pamidanda manut pararem banjarniya soang-soang; *ketinggalan*
- (6) Upakara tawur kasanga manut sakadi ring sor:

- Ha. Ring tileming kasanga kawastanin tawur kasanga, ketah kabawos Ngerupuk pacang magpag rahina Panyepian benjangne;
- Na. Pacaruan manut genah:
- 1) Ring wawidangan Desa Adat Padang Luwih pacaruan Panca Sata;
 - 2) Ring wawidangan banjar Pacaruan Eko Sato;
 - 3) Ring lebuah soang-soang krama masegeh agung manut arah-arah;
- Ca. Ring tepengan ngerupuk ngawit saking nyoreyang tan kengin jantos rahina benjangne, reh rahina benjangne sampun rahina panyepian;
- Ra. Tata cara ngerupuk mangda mamargi trepti, katureksain antuk prajuru/pecalang desa saha mabusana adat. Prade mamurug keni pamidanda manut pararem;

Pawos 46

Upakara rahina nyepi, nganutin catur pabratan sakadi ring sor:

(1) Amati geni. Tan kengin maapi-api sajawaning:

Ha. Sang madruwe rare dereng tigang sasih, nanging ring genah rarene kewanten;

Na. Sang matepetin, nanging ring genah sang sane sungkan kewanten;

Ca. Sang madruwe layon, nanging ring genah sawane kewanten;

- (2) Amati karya, tan wenang nyambut karya;
- (3) Amati lelungan, tan wenang malelungan, sajawaning patilik/pecalang desa lan prajuru desa miwah sang sane sampun polih uwak-uwakan (ijin) antuk ilikita pastika;
- (4) Amati Lelanguan, tan wenang masuara gora, maoneng-onengan, jajuden, prade mamurug brata panyepian keni pamidanda manut pararem.
- (5) Sane patut nreptiang palaksanaan brata panyepian punika: prajuru desa, patilik desa/pecalang desa saha mabusana adat;
- (6) Riwus rahina nyepi kawastanin Ngembak Geni;
- (7) Mapiteges pangelukaran yoga samadi, kaduluran antuk ngaksama (masima krama) soang-soang krama banjar/desa maka cihna pangawit icaka warsa;

SARGAH LIMA

SUKERTA TATA PAWONGAN

Palet 1

Indik Pawiwahan

Pawos 47

- (1) Pawiwahan inggih punika patemoning purusa kalawan pradana malarapan panunggalan kahyun suka cita kadulurin upasaksi sakala niskala;
- (2) Pamargin pawiwahan punika wenten tigang soroh luire:

- Ha. Papadikan, Kamanggala antuk pakurenan;
- Na. Ngerorod, ngarangkat riyin kasilibang wawu kakurenang (kawin lari);
- Ca. Nyeburin utawi nyentana (risampune kategepang antuk upacara pajati/jajamuman);
- (3) Pidabdab sang mawiwaha patut:
- Ha. Sampun mamargi daa teruna makadi sane menggah ring Undang-undang perkawinan panegarane pasal 7 ayat 1 UU No. 1 warsa 1974;
- Na. Sangkaning pada rena (tan kapaksa);
- Ca. Nganut kecaping agama Hindu;
- Ra. Prade pangambile sios agama, sang sane siosan agama punika patut kaupakarin antuk banten sudi wadani, pamekas panglukatan, salantur ipun sukserah ring sane mawiwaha;
- (4) Pamargin pawiwahan (parabian) inucap ring ajeng mangda taler nganutin Undang Undang Panegarane, inggih punika UU No. 1 Warsa 1974 saha PP No. 9 warsa 1975 miwah pasuara sane kamedalan antuk Gubernur Kepala Daerah Tingkat I Bali;
- (5) Sang sane mamurug sakadi kecaping (No. 2,3,4) manut tri pramana patut:
- Ha. Manawi nenten manut kecaping ring 3.na, manawi kapaksa (kaplagandang) sang kakalih patut palasang lan katur ring sang ngawiwenang;

- Na. Sang sane nyaruronin (ngicen genah) sang maka kalih mangda digelis masadok ring prajuru adat lan dinas, nenten dados langkung saking 12 jam. Prade piwal keni pamidanda geng alit manut pararem desa;
- Ca. Asapunika ugi sang sane nyarengan malegandang patut keni pamidanda manut pararem;
- Ra. Yening tan manut kecaping agama, kadanda manut pararem lan parabiane kapalasang;
- Ka. Manawi salah sinunggil sang marabian punika nenten manut sakadi sane munggah ring UU Perkawinan No. 1 warsa 1974 patut keni pamidanda manut pararem lan ilikita (surat ijin) saking raramanipun;

Pawos 48

- (1) Parabian sane kapatut ring Desa Adat Padang Luwih manut kecaping pawos 47 (No.1) risampun kacihnayang antuk:
 - Ha. Pawidi widanan, sanistane pabyakalan (madengen-dengan);
 - Na. Kasaksiang antuk prajuru banjar suka duka lan dinas, tur sang sane muput;
 - Ca. Sasampune kacihnayang antuk ha, na, ring ajeng mangda kaunggahang sajeroning pailikitan, tur katumusang ring sang ngawiwenang utawi akte perkawinan;
- (2) Parabian tan kapatut sakadi ring sor:

Ha. Natab upakara saking papaksan;

Na. Sinalih tunggil tan rawuh rikala pawidi widanan utawi tan dados sinalih tunggil kagentosin antuk keris, carang dapdap tur sane siosan utawi;

Ca. Nenten wenten saksi;

Pawos 49

Tata cara pawiwahan manut sakadi ring sor :

(1) Sapa sira ugi pacang ngewarangang pakulawargan nyane patut masadok ring prajuru, sane pacang maritatas manut tan manut kakecap pawiwahan punika;

(2) Pamargin pawiwahan:

ha. Papadikan:

1) Masadok (ngecub) ring sane madruwe wadone;

2) kaigumang babawos sang ngidih kalawan sang madruwe wadone saha dewasa pakerab sane pacang kaambah ri wekas (pakrunan);

3) Yening sang makakalih (antene) saha kaluargan nyane pada arsa dados kabakta budal;

Na. Ngarorod utawi kawin lari:

1) Raraman purusa ngawentenang pamilaku (ngeluku) antuk duta. Sakirangniya kalih diri, saha tegap muat suluh,

tan kengin kasepan ring arahina sajawaning sang ngambil saking sios kabupaten kengin ^{kesapan} kəsapan jantos tigang rahina;

- 2) Yening tan wenten pamilaku (pangelukuan), kaluarga wadone kengin maseserep wiadin netes, kaanter antuk prajuru adat lan dinas;
- 3) Tata carane netes saking kaluarga wadone katuntun antuk prajuru adat lan dinas;
- 4) Pagenahan antene tan kengin ring paumahan sang lanang sadereng mabyakala (madengen-dengen);
- 5) Sajeroning tigang rahina saking pamilaku (pangelukuan) kawentenang panyuakan.
Sajeroning panyuwakan patut kamanggala antuk geng pangampura (melaku pelih) arep ring raraman wadone;
- 6) Sasampune panyuwakan katampi paileh salantur ipun kaigumang babawosan saking kaluarga lanange marep ring kaluarga wadone, saha dewasa pakerab sane pacang kaambah riwekas utawi pakrunan;
- 7) Prade ^{panyuwakan} prakunan punika jantos ping ^{tiga} tuga tan katerima saking wadone, upakara pawiwahaniya dados kamargiang;

Ca. Pemargin pawiwahan Nyantana (Nyeburin) wenten sangkaning :

1) Papadikan:

Ha) Pakaluangan wadone masadok (ngecub) ring sang sane madruwe langane; *lanange*.

Na) Kaigumang babawosan sang ngidih kalawan kaluangan sang sane madruwe lanange, saha dewasa pakerab sane pacang kaambah riwekas (pakrunan);

Ca) Yening sang makakalih (antene), saha kaluarganyane pada arsa dados kabakta budal;

2) Ngerorod utawi kawin lari:

Ha) Risampune wenten pamilaku (pangelukuan) saking lanange pangelukuan punika kawaliang tur mangkin saking kaluangan wadone ngawentenang pangelukuan ring kaluangan lanange;

Na) Sasampune tigang rahina saking pangelukuan kawentenang panyuwakan;

Ca) Sasampune panyuwakan punika katerima saking kaluangan lanange kaiguman babawos, saha dewasa pakerab sane pacang kaambah riwekas;

Ra. Sajeroning babawos sampun ambe/adung kalaksanayang ring sakala niskala, antuk sarana jajauman miwah pawidi widanan:

- 1) Jajauman punika ngambe/ngadungang kayun soang-soang kulawargan sane maawak wadone;
- 2) Widi widana pinaka pajati niskala nunas sang maawak wadone ring pamrajannia;

Ka. Sajeroning pakkerab, palaksana ring skala:

- 1) Kasaksiang antuk prajuru banjar adat, dinas lan sang sane muput, tur kasobyahang mungguwing wenten sinalih tunggil warga mawiwaha;
- 2) Kalanturang antuk ilikita ring sang mawangrat;

Da. Tan kapatutang makta jajauman ring pradana yening wenten kapialangan ring paumahan pradanane;

Ta. Asapunika ugi tan kapatutang makta jajauman ring pradana yening dereng mabyakala (madengen-dengen);

Pawos 50

- (1) Piteges pawiwahan patut sang lanang marabi adiri, asapunika sawaliknia;
- (2) Sang lanang dados marabi langkung ring adiri yening sampun polih paiguman olih rabiniya sane dumunan;

- (3) Prade wenten logika sanggraha (mademenan tur beling) patut kasakapang. Sapa sira tan satinut nyakapin keni pamidanda ngaryaning banten panyepuhan ring Pura Desa/Bale Agung;
- (4) Prade wenten mamitra ngalang, ngawenang cemer pajagatan Desa Adat Padang Luwih, wenang kasisipa danda manut pararem tur kapalasang saha nyepuh ring pura Desa/Bale Agung, yening sampun prasida kabuktiang manut Tri Pramana;
- (5) Prade wenten dratikrama (lanange ngangkuhang dewek) muwang pradara (wadone ngangkuhang dewek) kasisipan antuk nyepuh ring Pura Desa;
- (6) Prade wenten ngarabianing wong arabi wenang keni pamidanda banten panyepuhan ke Pura Desa / Bale Agung tur ngawaliang prabeya ring sang sane madruwe rabi manut pararem;

Palet 2

Indik Nyapian

Pawos 51

- (1) Pawiwahan sida kawusang malarapan antuk palas marabian utawi makakalih padem;
- (2) Wusan mapikuren sinalih tunggil lampus, mapiteges balu;
- (3) Palas marabian wenten sangkaning wiwit wicara, praciha tan tumus suka citaning panunggalang idep sang alaki rabi, mapiteges nyapian;

- (4) Sang ayat palas marabian manut angka 3 ring ajeng mangdane pinih riyin ngawentenang babawosan ring sajeroning pakulawargannyane;
- (5) Prade babawosanne punika nenten manggihin pamuput sane becik dados kalanturang nunas pamutus ring sang rumawos (Pangadilan Negeri);

Pawos 52

Tata Cara Palas Marabian:

- (1) Sulur palas marabian prade sinalih tunggil anyasar laku (ngangkuhang dewek), cedangga, wirosaning laku (gedeg), matilar tan masadok miwah satata tan prasida malih adung;
- (2) Yening wicarane katumusang antuk lanange, patut makacihna sinalih tunggil :
 - Ha. Istrine paradara utawi anyasar laku;
 - Na. Istrine amandel sanggama utawi maambul-ambulan jantos 6 sasih;
 - Ca. Istrine cedangga/tan nyenggamen;
- (3) Yening katumusang antuk wadone maka cihna sinalih tunggil:
 - Ha. Lanange dratikrama (anyasar laku);
 - Na. Wangdu;
 - Ca. Tan nyenggamen saha tan ngupajiwain jantos 6 sasih;
- (4) Prade manut tri pramana sang mawicara inucap ring ajeng angka 2,3:

- Ha. Perabiane kengin makadi pawos 50 ayat 4;
- Na. Katiwakin upacara masapsap ring Pura Kahyanga Tiga miwah kasaksiang antuk prajuru desa adat lan prajuru banjar adat;
- (5) Prade palas marabian sangkaning lila cita:
- Ha. Nawur prabeya ring sang rumawos;
- Na. Pagunakaya polih paham pada;
- Ca. Bekel/tatadan soang-soang kakuwasa niri-niri;
- Ra. Warisan kakuasayang antuk sang sane maawak purusa;
- Ka. Sentana (anak-anak) kakuasan sane maawak purusa;
- Da. Ngaweruhang miwah ngupajiwa pratisentana manut swadarmaning guru rupaka;

Pawos 53

Prade riwekas sang palas kacihnayang adung malih patut ngalaksanayang pawiwahan malih manut pawos 48 ayat 1 ring ajeng;

Pawos 54

- (1) Krama balu wenten sakadi sane munggah ring pawos 5 ring ajeng Balu kabinayang dados:
- Ha. Balu luh wit sentana rajeg muah balu boya sentana;
- Na. Balu muani kapurusan muah balu muani nyeburin (boya santana);

(2) Swadarmaning balu inucap patut:

Ha. Nganggehang patibrata, tan kengin ngamargiang paradara/dratikrama;

Na. Ngewasayang waris, tan kengin ngadol. Ngadayang, makidihang, sajawaning olih kabebasan saking pianak-pianak utawi saking pakulawarganipun (prade pianakne kantun alit-alit);

Ca. Kengin ngidih sentana prade sampun wenten pidabdab sedereng sinalih tunggil lampus madasar antuk tri pramana wiyadin wenten ^{Kalurahan} kabebasan saking kaluarga sane sinanggeh kapurusan;

Ra. Kawenangan mawiwaha malih prade sampun polih paigum saking ipianak/daha/taruna utawi kulawarga kapurusan, tur prasida ngupajiwain sentana;

Pawos 55

(1) Balu tan kaucap pageh luire:

Ha. Dratikrama miwah paradara;

Na. Matilar saking paumahan tan masadok jantos salami 6 sasih;

Ca. Lempas ring swadarmaning balu, tan prasida ngeihin solah arep ring pituduh pakulawargan kapurusan;

(2) Yening macihna kadi ring ajeng manut tri pramana, wenang balu inucap (balu luh boya sentana muah muani nyeburin);

Ha. Kawaliang ring kulawargan nyane, antuk kaluargan kapurusan;

Na. Tan polih upon waris;

(3) Prade balu inucap pageh, nanging katundung/kawaliang antuk kulawarga kapurusan mangda kawentenang babawosan antuk kulawargan purusa lan pradana, kailikitayang tur kasaksiyang antuk prajuru desa/banjar tur polih pahan pagunakaya;

Palet 3

Indik Santana

Pawos 56

(1) Santana wenten kalih soroh :

Ha. Pratisantana (santana rajeg);

Na. Santana paperasan;

(2) Pratisentana inggih punika sentana sane metu saking pawiwahan (lanang, wadon, lan bancih);

(3) Prade pawiwahan tan ngawetuang sentana kengin ngidih sentana antuk upasaksi sakala sane kawastanin sentana paperasan;

- (4) Prade wenten parabian tan kapatut utawi tan manut drestaning alaki rabi, tur wadone mobot, saderenge bobotane punika em^bas patut kasakapin. (taler manut sakadi sane mungguh ring pawos 50 ayat 3);
- (5) Sentana sane medal punika patut wenten sane meras, mangdane ipun madruwe genah sane pastika;

Pawos 57

- (1) Ngangkat sentana manut tata cara, patut makacihna artha barana pamerasan (Panumbas basan buat/boreh) saha kasaksiang sakala niskala;
- (2) Sapasira ugi krama pacang ngidih sentana patut masadok ring prajuru banjar/desa adat sanistane asasih saderenge pamerasan kamargiang;
- (3) Prajuru banjar/desa patut nyiarang sawawidangan banjar/desane, sang sapasira ugi rumasa tan lila mangda nyadokang masenger kalih wuku sabanen pamerasan ring prajuru banjar/desa;

Pawos 58

- (1) Paperasan sinanggeh kapatut risampun^{makacihnan^{ng antuk}}
 - Ha. Widi widiana sane kapatut antuk sang wenang muput;
 - Na. Kasaksinin antuk prajuru adat lan dinas saha kasiarang ring paruman banjar;

- Ca. Wenten ilikita ungguhan tata sulur pamargin paperasan;
- (2) Sang sane patut kaperas anggen sentana kadi ring sor:
- Ha. Jadma sane maagama Hindu;
- Na. Papernahan (melaad/dasar) nedunang saking sang sane meras;
- Ca. Kulawarga saking purusa, yening tan wenten kengin saking wadone, prade taler tan wenten wawu kengin tunggal paibon, prade taler tan wenten wawu kengin sakama-kama;
- (3) Kengin ngangkat sentana langkungan ring adiri, lanang-lanang, wadon-wadon, utawi lanang wadon;
- (4) Yening wenten daa taruna sampun mayusa langkungan saking 40 warsa mangda kaerobin antuk kulawarganiya, yening tan wenten sane ngerobang dados ngangkat sentana manut no. 2 ring ajeng;
- (5) Swadarmaning sang sane meras sentana patut malaksana ^{pateh} pakch sakadi guru rupaka marep ring sang sane kaperas punika. Swadarmaning sang sane kaperas dados sentana patut malaksana pateh sakadi putra sesana marep ring sang sane meras lan pakulawarganiya. Prade wenten sane lempas sakadi inucap ring ajeng mangda kaigumang ring sajeroning pakulawarganiya tur kasaksiang antuk prajuru banjar;

Palet 4

Indik Warisan

Pawos 59

- (1) Warisan inggih punika tatamian pusaka, artha barana saha ayah-
ayahan makadi sukerta sakala niskala saking kaluhuraniya arep
ring turunaniya;
- (2) Sane kaanggehang warisan luire:
- Ha. Pusaka saking kaluhuraniya makadi:
- 1) Artha barana, tategenan/ayah-ayahan ;
 - 2) Druwen tengah makadi bukti pura dadya, siwa krama
(alat kapamangkuan pura), pamerajan;
- Na. Pagunakaya lan utang piutang;

Pawos 60

- (1) Akhli waris luwire:
- Ha. Pratisentana : sentana purusa, sentana rajeg;
- Na. Sentana paperasan lanang/wadon;
- (2) Prade tan sakadi ring ajeng kang sinanggeh akhli waris:
- Ha. Turunan purusa pernah ngunggahang makadi rarama misan,
rarama mindon;
- Na. Turunan purusan pernah kasamping makadi kaponakan
misan, kaponakan mindon;

- Ca. Prade akhli waris manut no. ha, na, ring ajeng tan wenten dados saking tunggal paibon;
- (3) Wekasan sane manut sinanggeh akhli waris ring ajeng patut maagama Hindu;

Pawos 61

Swardamaning ahli waris :

- (1) Nerima saha nguasayang tatamian pahan saking kaluhurniya makadi ngaremponin sanggah, pura saha pengupakaraniya, miwah nyeledihin ayah-ayah pawaris;
- (2) Ngabenan pawaris saha ngalanturang upakara ring pura;
- (3) Nawurin utang pawaris;

Pawos 62

Pangepahan warisan manut sakadi ring sor:

- (1) Risampune kalaksanayang pitra yadnya lan utang-utang ring pawaris katawur buntas;
- (2) Para akhli waris polih pahan pada, sangkaning warisan miwah saking pagunakayan pawaris;
- (3) Sinalih tunggil akhli waris ring ajeng tan polih pahan prade:
- Ha. Matilar saking sangkaning ngutang tategenan, utawi dewa, braya, agama Hindu;

- Na. Sentana rajeg kesah mawiwaha, miwah pratisentana nyeburin soang-soang kabawos ninggal kadaton;
- (4) Prade boya akhli waris kengin muponin^x kawanten, manut dudonan:
- Ha. Balu luh wiadin balu muani nyeburin (boya sentana);
- Na. Mulih daha wiyadin taruna, riantukan ring pawiwahan pecak sampun kabawos ninggal kadaton;
- (5) Pawaris kengin mapaweweh/mekidihin rikala maurip pinaka:
- Ha. Jiwa dana, tadtadan/bekel makacihna paweweh tetep ring ipianak/kulawarga sane kesah mawiwaha wiadin sane mulih daa/taruna;
- Na. Pangupajiwa paweweh padgatakala (nadak/napkala) olih pawaris maka pamupon hasil kemawon;
- Ca. Pedum pamong/pedum raksa, pahan pawaris padgatakala ngantos pedum jumenek saking pawaris arep ring akhli waris;
- (6) Prade wenten pratisentana pawaris ninggalin agama Hindu pawaris rikala maurip patut ngicenin pastika ring akhli warisnya indik warisan sane wenten;

Pawos 63

(1) Prade sajeroning pakulawargan wenten ahli waris langkungan ring adiri:

Ha. Kawentenang paigum indik pedum waris inucap

Na. Yan tan prasida, kengin nunas tatimbang ring prajuru banjar/prajuru desa adat;

Ca. Prade taler tan wenten cumpu ring panepas prajuru banjar/prajuru desa adat kengin numusang ring sang rumawos;

(2) Prade wenten karang pedi kaputungan, wenang sang prajuru banjar/desa mawosang (nureksa sila-sila) salur pakulawargan tur nibakang ring:

Ha. Akhli waris saking purusa manut pawos 60 ayat 2;

Na. Yening tan wenten sakadi no. ha, ring ajeng kengin katibakang ring wadon;

Ca. Prade taler tan wenten inucap ring No. na kengin katibakang tunggal paibon;

Ra. Prade tan wenten sakadi inucap ring No. ha, na, ca, wawu dados katibakang sakama-kama;

wit Part 4. Yan anugrah desane agama, anugrah anugrah anugrah

SARGAH NEM
SUKERTA TATA PALEMAHAN

Palet 1

Sukerta Pamitegep

Pawos 64

Karang, Tegal, lan Carik

- (1) Krama desa sane ngamong tanah karang apalebahan, patut ngawatesin karang inucap antuk pagehan, utawi tembok pinih utama, sane marep ka margine mangda kanten asri;
- (2) Wates sisi kangin miwah kaler patut kakaryanin antuk sang madruwe karang reh punika mawasta gagaleng kaluwan;
- (3) Prade karasayang pagehan punika nglikadin, yening pada arsa panganginnia, kengin batase ngangge pinget kewanten utawi ngange pal agraria (BPN) sane kakardi saking beton;
- (4) Asapunika taler yening wenten karang kabebeng, mangda kautsahayang wenten margi olih prajuru banjar lan jimbar ipun kirang langkung a depa agung;

Pawos 65

- (1) Sinalih tunggil krama banjar/desa tan kalugra:
Ha. Ngelalah karang, tanah pelaba pura, margi, tegal miwah carik;

- Na. Ngelalah tanah tegak Pura Kahyangan Tiga miwah setra;
- Ca. Ngembahang toya wit badan wawalungan, pasiraman/kakus pawaregan ka pakarangan krama siosan/kapaumahan siosan utawi ka margine;
- Ra. Ngentungan wangken wawalungan ka tukade utawi ka pakarangan krama siosan;
- (2) Prade wenten sakadi ring ajeng (pawos 65. ha, na, ca, ra) keni pamidanda:
- Ha. Patut ngawaliang sane kalalah miwah danda manut pararem
- Na. Sajaba danda sakadi ring ajeng (ha) maweweh panyangaskara tanah tegak Kahyangan Tiga sane kelalah;
- Ca. Patut nyampetin utawi ngaryanang pamargin toya sane sumeken;
- Ra. Patut nanem wangke inucap;
- Ka. Karang sane kagenahin warga desa adat Padang Luwih patut kaupapira sakala niskala;
- Da. Tan wenang nanem, nunjel sawa, yadiastun sawa karesyan ring pakarangan paumahan;

- (3) Krama banjar/desa nenten dados nuba, sawireh tuba (racun) punika ngarusak lingkungan lan tan manut ring paraturan pemerintah;

Palet 2

Papayonan

Pawos 66

- (1) Ngawit nanem papayonan patut adepa agung (± 2.5 m) ngajeroang saking wates;
- (2) Tan kalugra ^{gandus} wit taru (papayonan):
 - Ha. Mentik sajeroning wates;
 - Na. Ngelintangin wates, bilih-bilih mewasta mayanin ka pisaga prade wenten sakadi ring ajeng (na), kengin mawarah antuk pangardiniya tur kasadokang ring prajuru mangda mituduhin sang nruwening wit taru ngerebah taru inucap;
- (3) Yening sampun ping tiga nyadokang taler durung karebah kengin sang nyaduang ngerebah taru inucap, kasaksiang antuk prajuru;
- (4) Prade wenten sinanggeh mayanin, sang ajerih patut atur supeksa ring prajuru, tur risampun kaparitas, mituduhang sang nruwenang wit taru, munggel utawi sanistane nyepat gantungin;
- (5) Sane keni pamidanda panyangaskara (ngupakaranin) saha prabea manut pararem inggih punika:
 - Ha. Sang sane nruwenang wit taru sinanggeh mayanin, ngarubuhin wawangunan jadma siosan;
 - Na. Sang notor, munggel utawi ngarebah taru prade pungkat ngarubuhin wawangunan/karang paumahan jadma siosan;

Ca. Panyangaskara inucap sanistane prayascita jangkep tur
mecikang sane rusak;

(6) Prade wenten krama sane ngarebah papayonan, mangda
ngutsahayang nanem malih papayonan pinaka panggantina;

(7) *Handwritten notes:*
Pawos 67
Wewangunan
Palet 3

Palet 3

Wewangunan

Pawos 67

Wewangunan mangda:

Ha. Ngangge Astha Bumi miwah gegulak astha kosala kosali,
sanistane manut ring patitis niskala;

Na. Tan dadaos nyayubin ka pisaga;

Ca. prade wenten nyayubin ka pisaga risampun kasadokang ring
Prajuru keni pamidanda manut pararem. Prade ngewangun ring
tepi siringin wates, patut ngawentenang paigum ring pangadinniya
tur masadok ring prajuru banjar lan desa, yan memurug riwekas
prade kawarah antuk pengadilannia patut wewangunan inucap
kagubar antuk sang madruwe saha tan polih prabea kapocolan;

Ra. Prade ngawangun ring tepi siringin wates, yan sampun polih
paigum saking pangadinniya patut ngangge abangan, tur cacapane
tiba ka jero;

Handwritten notes:
Wewangunan saking wates timore pangadilannia kawangge
10 m

Palet 4

Wawalungan

Pawos 68

- Sahanan warga desa sane miara sakalwiring wawalungan patut sayaga nitenin, negul, ngelogor mangda tan ngarusak karang, utawi paabianan krama siosan, bilih-bilih ngantos ngeranjing ngaletihin Parhyangan Pura. Prade wenten sakadi ring ajeng sang katibakang ring prajuru banjar/desa mangda katiwakin pamidanda manut pararem;

*Yan ulente...
Karya...
Pawos 69*

Pawos 69

Tan wenang negulang utawi ngangon ring:

Ha. Palemahan Pura Kahyangan Tiga/Parhyangan-parhyangan Adat Padang Luwih;

Na. Pundukan sane wenten tanduraninya/pantuniya;

Ca. Tegalan sane madaging paabianan krama siosan;

Ra. Mungguwing ring Setra-setra, pampatan ka setrane, ring sisin margi ageng, dados ngangon, nanging tan dados negulang wewalungan. Prade wenten sakadi ring ajeng keni pamidanda manut pararem;

Pawos 70

(1) Prade kacunduk wawalungan ngrusak tur tan wenten mariangken, wenang kataban antuk sang katiban;

(2) Tata caraning naban (nangkep) wawalungan;

- Ha. Masadok ring prajuru banjar/desa, tur prajuru patut nureksain wawalungan punika;
- Na. Miara wawalungan inucap sepatutipun;
- Ca. Yan mamurug kecaping ring ajeng tan polih prabeya saking sang sane nruwenang wawalungan inucap;
- (3) Sang sane polih naban manut sakadi ring sor:
- Ha. Sasampune kasadokang ring prajuru taler tan wenten mariangken wawalungan inucap, patut kasadokang malih ring sang mawangrat (Pemerintah);
- Na. Taler tan wenten mariangken wawalungan inucap kengin kadruwenang risampun masenger ring pasadoke;
- (4) Sang sane nruwenang wawalungan inucap:
- Ha. Sang mariangken wawalungan punika patur maduluran antuk ilikita wiadin bukti lan saksi;
- Na. Patut nawur prabeya ring sang sane naban, manut pararem;
- (5) Ngadol utawi matungang wawalungan sane kataban, sederenge masadok ring prajuru tur wenten muktiang, sang sane ngadol utawi matungang punika keni pamidanda manut pararem;

Palet 4

Bhaya

Pawos 71

- (1) Pari indik bhaya, wenten bacakan par

ing sor:

- Ha. Jiwa bhaya, makadi kaepet patinnya;
- Na. Artha bhaya, kapandangan/kamalingan;
- Ca. Geni bhaya, katunuan utawi umah puwun;
- Ra. Er bhaya, balabar/anyudang embah;
- Ka. Dura cara utawi piwal ring ajah-ajah agama;
- (2) Sahanan warga desa sane katiban bhaya patut digelis tur supeksa ring prajuru utawi sang wenang mawosin;
- (3) Sahanan warga desa sane uning ring wenten jadma melaksana dusta mayanin patut ngawentenang upaya ngandeg tur digelis atur supeksa ring prajuru;
- (4) Yan prade katiban bhaya ageng upami jiwa bhaya, artha bhaya, geni bhaya, kapelegandang, sang katiban bhaya utawi sang amanggih bhaya inucap wenang digelis nyuarayang kulkul tur atur supeksa ring prajuru. Utawi kengin nunas pitulung ring pemerintah agung makadi polisi, hansip lan pemadam kebakaran;
- (5) Sahanan warga desa patut sayaga metetulung, ngarombo saha makta gagawan manut kawentenan bhaya punika, tur ngarombo sang sane keni bhaya, manut duhkitan nyane, antuk sih laksana sih dana miwah siosan mangda kaduhkitannia prasida polih katulungin;
- (6) Yan prade pacang maseserep utawi ngaledahin ritatkala kamalingan/ artha bhaya, patut nunas pangruak ring Prajuru, Kelian dinas utawi Prebekel;

- (7) Maseserep ring banjar utawi desa tios, patut polih pangruak ring prajuru utawi kelian banjar inucap;
- (8) I Prajuru patut nuntun mangda tingkahe maseserep manut ring pararem-pararem;
- (9) Sahanan wong malaksana dusta, sang ngawinang bhaya, patut keni pamidanda ring desa manut pararem, katiba jampi ring sang kabhayanin, nyangaskara, manut kawentenan bhaya inucap tur idusta katur ring pamerintah Agung;
- (10) Yan prade mayanin ngarusak utawi ngamaling druwen sane suci patut pamidanda punika kawewehin panyangaskara caru utawi prayascita;
- (11) Yan dusta saking dura desa, yan kaejuk patut kataban, raris kaaturang ring sang rumawos (pemerintah);
- (12) Sang dura cara ring agama prade kacihna manut tri pramana, wong inucap keni danda manut pararem;

SARGAH PITU
WICARA LAN PAMIDANDA

Palet 1

Indik Wicara

Pawos 72

- (1) Sane wenang mawosin makadi muputang wicara ring desa luwire:
Ha. Prajuru banjar suka duka;
Na. Pamucuk desa;

- (2) Prade sang mawicara tan wenten cumpu ring tata cara Prajuru banjar suka duka mawosin kengin nunas babandingan ring Pamucuk desa;
- (3) Pamuput panepas prajuru mangda nganutin awig-awig lan pararem;
- (4) Prade taler tan wenten cumpu ring pamuput Pamucuk desane, kengin numusang wicara inucap ring sang rumawos;

Pawos 73

- (1) Sahanan wicarane sane mawiwit kacorahan sakaluire, miwah sinanggeh nungkasin awig-awig pararem, patut pramangkin kabawosang tan nyantos pasadok. Sane patut mawosin inggih punika prajuru banjar suka duka, lan prajuru banjar suka duka kengin nunas panampih ring pamucuk desa manut geng alit wicarane punika;
- (2) Sajaba wicara sakadi ring ajeng patut nyantosang pasadok sang nunas bawos;
- (3) Panepase mangda pastika nyantenang iwang patut malarapan Tri Pramana (saksi, ilikita, bukti/saha tan maren nepak ring catur dresta);
- (4) Wicara sane kasadokang yening during kabawosang sajeroning awuku, patut wenten panyumeken, sasampune tigang rahina saking panyumeken punika nenten taler kabawosang wenang numusang pamuput ring sang rumawos;

Palet 2

Indik Pamidanda

Pawos 74

Mungguwing pamidanda sane katiwakan ring:

- (1) Sahanan warga desa sane piwal ring sadaging awig-awig, prajuru patut ngelingang warga inucap;
- (2) Sasampune kaelingan taler tan prasida ngesehin solah maprawerti, risampun kaparituduh antuk prajuru, inggih punika kengin kasepekang;
- (3) Gumanti sang inucap eling ring raga tur nunas pangampura indik keiwanganiya ring prajuru maduluran antuk pejati ring Kahyangan Tiga, tur risampun mrasidayang dewek iprajuru patut ngruwak saha nyobyahang ring krama desa;

Pawos 75

- (1) Desa/Banjar wenang niwakang pamidanda ring warga sane sisip, sasampune wenten pamutus saking prajuru banjar suka-duhka utawi Pamucuk desa;
- (2) Paniwak inucap kalaksanayang olih prajuru banjar suka duka utawi prajuru desa adat manut dudonan;
- (3) Agung alit pamidanda masor singgih, manut kasisipane, tan maren ngupadi dharma kawelas arsan, pinih ajeng maka buatan kasudamalan desa;

- (4) Bacakan pamidanda lwire:
- ha. Pangampura/nyuaka;
 - na. Upakara panyangaskara;
 - ca. danda artha;
 - ra. Kasepekang /kenorayang makrama;
- (5) Jinah utawi artha barana pamidanda ngaranjing druwen desa/banjar;

Pawos 76

- (1) Rikala pawanengan nawur dadendan/dadosan, yening lempas ring pawanengan, risampune kalugrahin tempo, keni pamidanda artha nikel. Risampune keni danda artha nikel tur sampun tempo malih taler tan katawur wenang kasepekang;
- (2) Pamidanda – pamidanda sane kawastanin buntas risampun:
- Ha. Pamidanda pangampura/nyuaka: Nunas pangampura/nyuaka ring kaiwanganiya, tur kalaksanayang sajeroning paruman banjar/desa;
 - Na. Pamidanda upakara panyangaskara: ngaturang upakara panyangaskara ka pura manut dudonan;
 - Ca. Pamidanda artha: katawur antuk artha manut putusan;

Ra. Kasepekang: nunas geng pangampura/nyuaka ring krama banjar /desa riantukan piwal ring pasubayan sanc kararemang pecak, saha nawur upakara panyangaskara utawi artha brana manut putusan;

SARGAH KUTUS

NGUWAH NGUWUHIN AWIG-AWIG

Pawos 77

- (1) Nguwah nguwhin awig-awig desa puniki kalaksanayang antuk paruman pamucuk desa;
- (2) Paruman pamucuk desa punika karawuhin antuk sakirang-kirang ipun 2/3 (kalih pah tiga) saking pamucuk desa;
- (3) Pamutus bawos mangda kadasarin antuk gilik saguluk;

Pawos 78

Pakarsan paruman indik nguwah nguwhin awig-awig kadi ring ajeng kengin kamedalang antuk klihan desa adat, klihan-klihan banjar suka duka yadiastun niri-niri miwah sinarengan, risampun kararemang ring banjar ipun soang-soang;

SARGAH SIYA

PAMUPUT

Pawos 79

- (1) Awig-awig puniki kawastanin awig-awig Desa Adat Padang Luwih;
- (2) Awig-awig puniki kamargiang ngawit kararemin;

Pawos 80

- (1) Sakeluwiring sane wenten sadurungnya, patut kaanutang ring sadaging awig-awig puniki;
- (2) Sakeluwiring sane durung kabawos sajeroning awig-awig puniki, patut kamargiang manut tata cara sane sampun katah mamargi, wiadin kadulurin antuk pararem-pararem, nanging pararem-pararem puniki nenten dados piwal ring sadaging awig-awig puniki;
- (3) Ngardinin Pamucuk Desa, sane kaping pisan (Tahap 1) kasukserah ring kelian Desa Adat Padang Luwih, tur mangda sampun puput kakardiang salamin ipun 3 (tigang) sasih, ngawit saking pararemin awig-awig puniki.

Awig-awig puniki, kararemin duk PURNAMANING KAPAT, rahina
Buda Kliwon, wuku Ugu, sasih Kapat, Icaka 1906, utawi tanggal masehi
10 Oktober 1984, ring paruman krama Desa Adat Padang Luwih.

Prajuru Desa Adat Padang Luwih

~~Pandesa Adat Padang Luwih,~~



I Gusti Ketut Suparta, S.Pd

1. Klihan Banjar Adat Tegaljaya,


I Nyoman Sudana.

2. Klihan Banjar Adat Celuk,

Drs. I Ketut Oka Sudana, M.Pd.

3. Klihan Banjar Adat Jeroan,

I Gusti Ngurah Pernata.



LAPIHAN (PAKELING)

BABANTEN RIKALA NUNAS TIRTA RING KAHYANGAN TIGA (PENEHAS TIRTA)

I. DEWA YADNYA :

1. Utama : Peras daksina, suci gede, sayut sidakarya
pangetut di ketelunne.
2. Madia : Peras daksina, suci
3. Nista : Peras daksina

- #### II. PITRA YADNYA
1. Nguwangun : Peras daksina, suci gede
Panebusan, pangulapan, punia
 2. Mekelin : Peras daksina, suci
 3. Ngidih olas/mapendem mapangentas/
ngerit: peras daksina, suci
 4. Mapendem: Peras daksina.

BANTEN UPAKARA NGABEN NGIDIH OLAS WIADIN MAPEN- DEM

1. Banten Pabersihan :
 - a. don intaran di alis
 - b. bungan teleng, meka di mata
 - c. waja di gigi
 - d. pusuh menih di cungguh
 - e. gagaleng biyu kayu mapis 250 keteng disirah

- f. malem di kuping
 - g. iga-iga tengawan mepis 7 keteng,
tengebot 7 keteng
 - h. buku-buku penyolasan liune 8 (11 keteng)
 - i. kewangen di tangkah tetelu mepis a'7 keteng
 - j. kewangen di lima lan batis patpat mepos a'2 keteng
 - k. don jangu don kewangen di batis, di limane don tebu
 - l. gegosok taluh wadah takir
 - m. gegencan
 - n. bebek, anget-angetan
 - o. bata meulig di awak
 - p. don tuwung, sampar wantu di sarira
 - q. boreh don ketotok lan don basa-basa
 - r. lengis mako di sarira, lengis taluh di lima
 - s. buah pala di palane, jebugarum di sirah pangi di jagut
 - t. minyak wangi (lengis apun)
 - u. lengis pengulung
 - v. itik-itik benang ring inan batis sang lampus
 - x. ante 21 katih misi penyalin
2. Caru siap brumbun malayang-layang majekjek di natahe
 3. Banten papekatan di lebuhe
 4. Di Pemuwunan : peras pamulungan.

- Daksina peneteh, beras manca warna, pis 225 keteng, kewangen
21, canang 7 tanding di batis
5. Nuduk galuh : (banten ngereka): pangulapan tumpeng patpat,
prayascita, biya kaon, soda putih kuning, pasucian, rantasan.
6. Banten Surya:
- Mungguh : Dewa-dewi, Siwa bahu pucuk bahu, daksina
gede 1, daksina cenik 2, tipat kelan, suci 2,
rantasan.
- Sor : Segehan agung, daksina 1, gelas sanga.
- Ben Surya : Pala kiwa, bebek 1, siap 1, biyu lalung.
7. Di Pamuwunanne suwud matunjel : panjang ilan 2 (lebeng matah)
- Lebeng : peras, nasi, raka, peras pandan 11, tanah legit,
bias, tingkih, pangi, beluluk, don tebu salah,
kaul, taluh maguling, tipat lebeng
- Matah : peras, tumpeng matambus, tipat matah, taluh
matah, tanag legit, bias, tingkih, pangi,
beluluk, don tebu salah, kaul.
- Beb panjang: balung gegending, sate gulung 11 saet, sate
lembat 5, sate asem 5, pesan 7.
8. Banten saji :
1. Daksina 1, peras, soda putih kuning
 2. saji kasela

3. diuskamelegi, soda putih kuning
4. oton asoroh majrimpen
5. rantasan
6. banten kalap asoroh: daksina gede, suci, punia asoroh mabe bebek, siap
9. Banten panganyutan : peras daksina, segehan selem atanding, arak,asep, cina
10. Yan pacang kaabenan nenten ngangge sanggah tutug, yan pacang kapendem wawu ngangge sanggah tutug.

DAFTAR : NAMA-NAMA PURA RING WAWIDANGAN DESA ADAT PADANG LUWIH

NO	NAMA PURA	PANGEMONG	PIODALAN	KE T
	<u>Banjar Kuwanji</u>			
1	Pura Pajenengan	I Made Karja	Tumpek Landep	
2	Pura Merta Sari	I Made Sadia	Buda Cemeng Warigadean	
3	Pura Manik Pajeng	P Made Raka Puja	Wrahaspati Langkir	
4	Pura Dalem Tibung	Banjar Kuwanji	Redite Kliwon Pujut	
	<u>Banjar Gaji</u>			
1	Pura Ulun Desa	Banjar gaji	Redite Umanis Langkir	
2	Pura Dalem Bajangan	-	Anggara Kliwon	

			Perangbakat.	
	<u>Banjar Jeroan:</u>			
1	Pura Duhur Bingin	I Gst. Putu Berati	Anggara Kasih Medangsia	
2	Pura Dalem Kebon	I Gst. Rai Diyet	Buda Cemeng Menail	
3	Pura Wates	I Gst. Ngr. Setiyaki	Buda Cemeng Langkir.	
4	Pura Penyarikan	I Gst. Ngr. Ag. Dharma Susila	Redite Umanis Kuningan	
5	Pura Meliling	I Gst. Ngr. Pardana	Buda Cemeng Merakih.	

NO	NAMA PURA	PENGEMONG	PIODALAN	KET
	<u>Banjar Pendem</u>			
1	Pura Dalem Dasar	I Nym Alit Astawa	Buda Umanis Tam bir.	
2	Pura Merta Sari	I Made Surata	Buda Cemeng Kela wu.	
3	Pura Taman Sari	I Nyoman Suara	Anggara Kliwon Perangbakat.	
4	Pura Dalem Pakerisan	Pt Gde Swadana	Saniscara Kliwon Krulut	
	<u>Banjar Celuk</u>			
1	Pura Dalem Pauman	I Gst. Md. Dembu- ang .	Buda Cemeng Kla - wu.	

2	Pura Dalem Sima	I Made Rai Suidasa	Saniscara Pon Dunggulan.
3	Pura Tunon	I Made Kanja	Saniscara Pon Dunggulan
4	Pura Datengan	I Made Sarwa	Redite Wage Kuningan.
5	Pura Dangka	I Made Kantra	Redite Wage Kuningan.
6	Pura Ratu Ngurah	I Made Sumandra	Buda Kliwon Ugu
<u>Banjar Tegaljaya</u>			
1	Pura Dalem Bajangan	I Made Dom	Anggara Kliwon Perangbakat.
2	Pura Dalem Batur	I Made Candra	Buda Wage Warigadean.
3	Pura Ulun Desa	I Wyn Pijit	Redite Umanis Langkir
4	Pura Sempuana	I Made Kasta	Sukra Paing Dunggulan
5	Pura Ratu Ngurah	I Wayan Dengan	Saniscara Kliwon Wayang.
6	Pura Kawitan Pasek Kubayan	I Nyoman Rianta	Buda Kliwon Pahang